



**ka ieit  
ha ban  
da biej**

**KA MOTHER TERESA**

Pascal Malngiang

Acc. No. 2125/12  
Class No 895.93.M.29.IE1  
Author Malngiang, P.  
Title Ka Iet haban ela  
Biet

---

Acc. No. 2125/12.

**STATE CENTRAL LIBRARY**  
**GOVERNMENT OF MEGHALAYA**  
**S H I L L O N G**

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence. Unless a borrower points out the injury at the time of borrowing the book, he shall be required to replace the book or pay its price.*

**Help to keep the book fresh and clean**

**DATE LABEL**[illegible]



# KA IEIT HA BAN DA BIEJ

*Ka Mother Teresa*

By

**PASCAL MALNGIANG**

1985

**DON BOSCO YOUTH CENTRE  
SHILLONG 793003**

Central Library  
Shillong

~~~~~

**Ka jingsngewnguh ia i**

**Kong MARY TORPIANO**

**bad ia ki hymmen ki para jong i**

**na Malta**

**kiba la iarap**

**ban shon ia kane ka kot.**

~~~~~

**Ka Hok longtraï la tyngkai da u Nongthoh**



**Z 130**

**Don Bosco Technical School**

**Shillong 793003**

# K I S K E R

	SLA
<i>Kyrkhu U Blei</i> ... ..	5
<i>Shikyntien</i> ... ..	8
1. Na Shiliang duriaw ... ..	11
2. U Blei U kdew Lynti ... ..	17
3. Ka Daw ka Jingieid ... ..	25
– Ki skul ... ..	26
– Ka Nirmal Hriday ... ..	27
– Ki jingeh ... ..	29
– Ka Prem Dan ... ..	31
– Ki soh ka jingtrei shitom ... ..	31
– Ki Khunswet ... ..	33
– Ki Nongpang Nianglyngkut ... ..	36
4. Ka 'Mat Kyliang ... ..	41
– Ki Sistar Missionaries of Charity ... ..	41
– Ha Meghalaya ... ..	50
– Ki Brodar Missionaries of Charity ... ..	53
– Ki Missionaries of Charity Contemplatives ... ..	56
5. Ki Nongiatrei lang (Co-workers) ... ..	58
– Ka Seng ki Nongiatrei lang jong ki bapang bashitom ... ..	58
– Ki Nongiatrei lang ... ..	60
6. Ka Nam bad ka burom na ka Pyrthei ... ..	65
7. Ka Briew jong u Blei ... ..	73
– Ki Khep jingeh ... ..	78
8. Ka Mother Teresa ka ong : ... ..	81

S. J. J. J. J.

ED



Central Library  
3



*God bless you,  
M Teresa me*



### MESSAGE

Jesus is the Light  
Jesus is the Truth  
Jesus is the Life

We too must be the  
Light of Charity  
Truth of Humility  
Life of Sanctity.

*God bless you  
M Teresa*

---

### U KYRWOH

U Jisu U long ka Jingshai  
U Jisu U long ka Jingshisha  
U Jisu U long ka Jingim

Ngì ruh ngì dei ban long

Ka Jingshai jong ka Jingield  
Ka Jingshisha jong ka Jingsngewrit  
Ka Jingim jong ka Jingkhuid-Kyntang.

U Blei Un kyrkhu ia phi,  
M. TERESA, M.C.



**"Lada don ki baduk  
ha u bnai,  
Ngin sa leit shatei ruh  
Khlem pep."**

**- M. TERESA.**

---

## **KYRKHU U BLEI**

Ha ka 9 tarik u rymphang 1981, nga la ioh ia ka shithi na ka Mother Teresa. Ka la thoh pynkut da kine ki kyntien kiba shoh mynsiem : "Kaba kongsan kam dei ka jinglah jingiai jong ngi ban trei bun ki kam ki jam ; hynrei ka jingieid kaba ngi bsut bad ngi pynpaw ha ki jingtnei jong ngi, la ki long tang ki barit bad ki bym i myntoi ruh."

Ka Mother Teresa ha kine ki snem ka la leit jngoh ia ki 'Dewbah jong ka pyrthei baroh bad ka la poi bunsien ruh sha kine ki Lum jong ngi. Ka long da shisha ka Angel jong ka Jingieid bad ka Jingsuk. Ym dei tang ki baduk bathngan kiba donkam ia ka, hynrei wat ki badon ba em, kiba biang, kiba pahuh ruh ki sngew ba khlem ka Mother Teresa te la jynjar hi khait. U Pandit Jawaharlal Nehru u la ong : "Ngeit ia nga Mother, Ngi baroh ngi donkam ia phi, kumba ki baduk ki donkam ia phi" (New Delhi, 1961). Ngi baroh hi ngi sngewdonkam ia ka Mother Teresa - namarba ka long ka shap bapaw jong ka jingieid jong u Blei ia ka pyrthei. Nga sngewkmen shikatdei

eh ban tyrwa ha ki Para ri jong nga ia kane ka thup Jingiathuhkhana bashisha kaba nga la thoh hadien ki jingwad bniah kiba sani. Nyngkong-nyngshap, nga sngew dei ban ai khublei ia kane ka Riewkhraw, Ka Mother Teresa, kaba la phah ia u kyrwoh ba-kyrpang na ka bynta jong ngi ki Khasi-Pnar, kumjuh ruh ia ki khun jong ka, ki Missionary sisters of Charity, kiba don ha Nongrimbah, Laitumkhrach, kiba la phyllicw ha nga bun kiei kiei kiba iadei bad ka jingim jong ka. U Blei Un nang kyrkhu kyrdoh ia ki ! Nga ngeit ba ka jingdon jong ki ha kane ka Nongbah, Shillong bad ha Nongpoh kin nang pynkynmaw ia ngi ba U Blei U dei Ka Jingieid.

Ngam lah ruh khlem da ai khublei kyrpang ia u Rangbah E.K. Mawlong, uba long u Speaker ka Meghalaya Legislative Assembly uba la kynthoh sngewtynnat halor kane ka kot. Khublei shibun na ka bynta ka jingpynshlur bad ka jingai mynsiem lem jong phi.

Dei u Phadar Joseph Cilia, S.D.B., uba la kynshoit ia nga ban ym pynsepei ia kane ka sap Blei ban thoh kot thoh sla. Lada ym don ma u, kane ka kot kan dang sah ha ka almari buh kot jong nga khlem pep. U Blei Un kyrkhu kyrdoh ia phi. Nga sngewnguh ruh ia u Bah A.B.M. Roy, Editor U Nongprat lynti, u Bah Bernard Pakma bad kiwei de ki lok ki jor kiba la ia noh jynsur la u synniang ha kaba pule, kaba ai jingmut bad ha kaba pashat lem ha nga ia ki artikil bad ki kot kiba ia dei. Khublei shibun ia phi baroh.

Ka jingsngewnguh kaba kyrpang ka leit ruh sha i Pa bad i Mei kiba la pynbiang ia ki jingdonkam

jong nga baroh da ka jingieid. Khlem ka jingkit-tyrpenng lem bad ka jingpynshlur jong ki ngan ym da long kumba nga long. Khublei ar'ti ar'jat ia phi !

Nga pdiang sngewbha ia kino kino ki jingai jingmut na phi ki nongpule ban nang kham pynbiang shuh shuh ia kiei kiei kiba duna.

## **K H U B L E I !**

**Paskal Malngiang**  
(U Nongthoh)

Kharmalki,  
Shillong 793 001,  
21 tarik, u 'Nailur 1985.



**Shri E. K. Mawlong**

**Speaker**

**Meghalaya Legislative Assembly**

**July 24, 1984.**

## **S H I K Y N T I E N**

Nga dap da ka jingsngewtynnad kaba khraw ban ioh ban ai kane ka lamphrang shikyntien arkyntien halor kane ka kot ba la thoh da u Bah Pascal Malngiang shaphang ka 'Mother Teresa'. U Bah Pascal Malngiang u dei uwei na ki samla uba pyrshang ban long u nongthoh mynta bad kane ka jingpynmih jong u, ka long kawei na ki jingpyrshang kiba ngi dei ban ai ka jingkhublei bad ka jingiaroh.

Nga kynmaw ba ki don ki Riewniam kiba la pynmih bun ki kot bad ki don na ki kiba ngi pyndonkam mynta ha ki skul bad college ruh. Hynrei kine ki nongthoh riewniam kim don shuh bad ngi mynta. Ngi kynmaw kum ki jong u Rev. Fr. Elias, S.D.B., u Rev. Fr. Costa, S.D.B., u Rev. Fr. Correnzia, S.D.B., u Mons. E. Bars, S.D.B., u Rev. Fr. Dalzovo, S.D.B., u Rev. Fr. Bacchiarello, S.D.B., kiba la ioh thiah ha u Trai.

Hadien jong kitei ki nongthoh ba nga la kdew haneng, ki samla kum u Bah Pascal ki la mih sha khmat ha kum kine ki kam ban thoh ei ei shaphang

ki riewkhrav jong ka Balang ne kiwei pat ki jingthoh  
ki ban long ka jingmyntoi ia ki nongpule.

Ka Mother Teresa ka dei ka briew kaba la paw-  
nam mynta ha kylleng ka Pyrthei. Ka la seng ia kawei  
ka jingiasyllok ki Sistar kaba kyrteng 'Ki Missionary  
jong ka jingieid', bad mynta kine ki Sistar ki shakri  
ha kylleng ki bynta jong ka pyrthei, ym tang ha ki ri  
ba dang sahdien, hynrei ha ki ri sepngi ruh. Ki don  
ha Nongbah Rome kawei ka convent jong ki ruh.

Wat la ki paidbah kiba bun ki la tip ne sdang ban  
tip shaphang ki kam kiba khraw ba ka Mother Teresa  
ka la leh, hynrei bun pat kim pat tip lehse ia ki snem  
jong ka jingialeh jong ka marwei pyrshah ia ki jingeh  
kiba bun bah. U Bah Pascal Malngiang u la leh ia ka  
kam kaba khraw ha kaba pyrshang ban thoh ia ka  
jingim jong ka Mother Teresa, ia ki kam shlur jong  
ka ban sdang marwei ban ai jingiarap ia kiba pang  
kiba shitom, ki duk ki rangli bad ki khlem iing khlem  
sem ne khlem kur khlem jait jong ka nongbah  
Calcutta.

Ki riewkhuid kum ki jong u Don Bosco, u Cardinal  
Cardijn, u Brother de Foucald bad mynta pat ka  
Mother Teresa, ki la mih ban trei ia ki kam paidbah  
bad ban shakri ia la ki para briew kiba shem jynjar.  
Ha ka pyrthei kaba mynta, ngi shem ba ki sorbah ki  
mih ha kylleng bad ki khapngiah da ki briew kiba  
tuid ban buhai shnong na ki nongkyndong. Bad dei  
ha kum kine ki jaka bad sor ba ngi iohi mynta ia ki  
jingeh kiba har rukom kiba ki briew ki iakynduh,  
naduh ka jingduk ka jingkyrduh, ka jingbym ioh kam  
ioh jam, ka jinghiar kyrdan ka longbriew manbriew

bad kiwei ki jingeh kiba teng teng itriem ban peit ne wat ban mutdur ruh. Bad dei ha kum kine ki khep jinglong briew ba ki bor jong ka jinglum ki kner ia la ki tyrsim ban khñiot ia ki mynsiem briew khamtam kito kiba la duh la ka jingkyrmen ha la ka jingim. Bad dei ha ki jaka kiba kum kine ba ngi donkam ia ki nongtrei ki ban ialam ia ki briew ban im ha ka lynti kaba dei. Ka Mother Teresa ryngkat bad ki sistar jong ka, ki la shim ia kane ka bynta ban iarap bad pyntngen ia kito kiba donkam ia ka jinglehisynei.

Ka Mother Teresa ka la sdang ban phah ruh ia ki sistar jong ka ban trei hapdeng jong ki khun u Hynñiew Trep jong ngi. Ngi la iohi ia ki kam lehisynei jong ka ia ki bapang ñianglyngkut ha Nongpoh. Nga khmih lynti ba kane ka kot shaphang ka Mother Teresa kan ai mynsiem ia ki ba bun bah ki briew, khamtam ia ki samla ka ri jong ngi, bad kan long kum ka tyllong umpohliew na kaba kin kyrsoi ki um ba shngiam ka jinglehisynei bad ki kam babha ia kito ki para briew kiba donkam ia ki.

## K H U B L E I

( E. K. MAWLONG )

**"Ka India,  
Ka long ka Ri jong nga,  
Bad Nga,  
Nga dei ka nong India."**

**– MOTHER TERESA.**

# **1.**

---

## **NA SHILIANG DURIAW**

"Khyndiat taiew mynshuwa," la ong ka Mother Teresa, "Nga la iohsngew ba don kawei ka iing ka sem ha nongbah Calcutta kaba khlem ioh jingbam da ki sngi. Nga la rah u khaw khyndiat bad nga la leit beit-beit sha kata ka iing, ka iing ka babun paid. Katba nga dang don hangta, kata ka kmie ka la sam ia uta u khaw ha ki ar bynta, kumta hi ka la leit sha kawei pat ka iing kaba don markhap, kaba long musulman. Haba ka la wanphai nga la kylli ia ka 'Balei phi la leh kumto ia uto u khaw uba nga la wanrah?' Ka la peit shaiñ ia ki khmat jong nga bad ka la ong: 'Ma ki ruh ki thngan. Ma ki ruh ki khlem bam eiei.' Ka la tip ba ki ruh ki khlem bam khlem dih da bun sngi; bad shuwa ba kan shet kan tiew na ka bynta ki khun la jong, shuwa ba kan sdang leh eiei, ka la pyrkhat shuwa shaphang ki paramarjan jong ka. Kane ka long ka jingieid kaba im. Na ka bynta jong ka hi shimet ym shym don jingpher la kita ki briew ki long ki Musulman, ma ka pat ka Hindu, bad la ai ia uta u

khaw da ka sistar kaba long Kristan. Ka la tip ba kito ki briew ki da donkam eh ia ka jingieid jong ka bad ba ki long ki paramarjan jong ka”.

Kane ka briew kaba aibam-aidih ia ki baduk-ki bakyrduh kaba lum kaba lang ia ki bapang bashitom, kaba tah dawai ia ki nongpang nianglyngkut, kaba ai jingkyrmen ia ki tymmen ki kro bad kiba ha tmier ka jingiap; ka briew kaba long da shisha kum ka Kmie ia ki million ngut ki nong India, la kha ha u 'Nailar 27 tarik, 1910, ha kawei ka nongrit ha Yugoslavia ba kyrteng ka Skopje. Hadien khyndiat sngi la ai baptisma bad jer kyrteng ia ka Agnes Gonxha Boyaxhiu.

Ki kmie ki kpa jong ka Agnes ki la long tang ki nongrep, hynrei ki la sad ki la khyllong ia ka skum kaba iphuh-iphieing bad kaba kmen. Ka Mother Teresa ka ju iai pyrta kumne :

“Ka iing ka sem jong nga ka la long ka basuk bad kaba kmen bha”, bad ha ki snem kiba bud ka da kyntu jur ia la ki nongiatrei-lang da kine ki kyntien :

“Nga angnud da shisha ba maphi ki Nongiatrei lang jong nga, phin saiñdur ia la ka jong ka iing ka sem ha ka nongrim ka Ying Bakhuid ha Nasaret, ha kaba ka jingsuk, ka jingieid, ka jingkmien bad ka jingphuh samrkhie ki synshar. Phi long ki nongiatrei lang jong u Jisu bad ha kaba long ki nongiatrei lang jong U, phi ktah ia U, phi ieid ia U ha ki ba ha iing ha sem jong phi; namar ka jingieid ka dei ban sdang nyngkong-nyngshap na la iing. Phi don ia ka kamram ban ieid, hynrei kane ka dei ban sdang na ki Ying ki sem jong phi hi. Phi dei ban don por nyngkong-nyngshap na ka bynta ki la jong shuwa, hadien nangta sa ia



kiwei pat. Pynlong ia ka iing ka sem jong phi ka pdeng jong ka jingsngewlem bad ka jingiamap kyliang kaba khlem kut. To ia long ki basbun bad ki basngewsynei. Wat shah ia uno uno ne kano kano ka briew ba kin wan sha phi bad kin mih noh na ki iing jong phi khlem da long kiba kham bha bad kiba kham kmen. To ngin ia sdang, haba kumta, ha ka jaka kaba ngi don, bad ki briew kiba ia jan eh, nangta ngin sa lah ban pynphriang ia ka kylleng."

Haduh ba kan da dap 12 snem ka rta, ka Agnes ka la im kum kiwei pat ki para khynnah ha kata ka nongkyndong Skopje. Ki kmie ki kpa jong ka ki la phah ia ka sha ka skul shnong sorkar, naba ym shym don skul niam hajan hangta. Tangba, wat la kam shym la iohlad ban leit sha ki skul niam, pynban kam shym la duh noh ia ki jinghikai shaphang ka Niam bad ki akor ki burom kiba ia dei bad ka khynnah kaba long Kristan. Ka Agnes ka la long ka khynnah kaba skhem jingmut haduh katta katta, haduh ba ka la pyrto ieid hadien :

"Nga kloï ban aiti noh wat ia la ka jingim, hynrei ym dei ia ka jingngeit jong nga."

Ka Agnes ka la long ruh ka Riewdkhot jong ka Seng Sodaliti ha ka Parish jong ka. Katba ka dang long ka riewdkhot bashitrhem jong kane ka seng, u Phadar Rangbah u la ju pyllait por khnang khnang ban kren ha ki shaphang ka jingkhhot u Blei, ka jing-aiti-mon jong u Jisu ialade ban shakri ia ki baduk, bad kumta ter ter... Kine ki symboh jingpyrkhat ki la rung jylliew bha sha ka dohnud bad ki jingmut jingpyrkhat jong kane ka khynnah bad u symbai ban

long Mishonari u la sdang ban speh lung ha ka suki pa suki.

Dei ha u Nohprah 30 tarik 1925, ba khyndiat ngut ki Phadar Jesuit (Kynnoh Jeswit) kiba na ka shnong jong ka ki la mih ban wan sha Calcutta. Uwei na ki u la dei ban leit sha Kurseong ha Darjeeling. Kine ki Mishonari ki ju thoh bun tylli ki shithi sha la ka jong ka parish ban batai shaphang ki kam ki jam ba ki dang trei ha Bengal. U Phadar Rangbah jong ka Skopje u ju smat ban pule ia kine ki shithi ha la ki jong ki briew, khamtam eh ha ki samla samhoi, khnang ban pynrung jylliew ha ki ia ka mynsiem ban ieid ia ki mishon.

Haba ka Agnes ka la dap 12 snem ka rta, ka la iohlad ban iakynduh bad uwei na kine ki Mishonari kiba ju smat thoh shithi bha. Ka Agnes ka la sngap dngong ia ka jingiathuh jong u shaphang ka trei ka ktah jong ki ha India. Ka Agnes ka la sngewshoh jingmut eh da ki kyntien pynkut jong u : "Man la u briew ha ka jingim, u dei ban bud ia la ka jong ka lynti."

"Bud ia la ka jong ka Lynti !" kane ka kyntien iawai ka la ktah shibun eh ia ka. Kumta, ka la puson bad duwai bad ka la sngew ba u Blei u da kwah eh ia ka ban tyrwa ia la ka jingim na ka bynta ka Ri India baiar. Ka Agnes ka la pan jingmut de na la ki jong ki bahalor ban long ka Mishonari ha India. Kumta kine ki Phadar kiba iohi ia ka kti jong u Blei ki la pynpaw ia la ki jong ki nia, ba ka jingim ha ki Ri Mishon kam long kaei kaei kaba dap tang da ki jingsuk ki jingkmn. Haba ka Agnes ka la pynpaw ia la ka mon bashynrang, ki la iarap ia ka ban rung ha

ka jingiasyllok ki Sistar Loreto kiba don ruh ia ka Konben ha Calcutta.

Haba ka la dap 18 snem ka rta, da ka jingsngewkmen kaba khraw, la pdiang ia ka Agnes kum ka khynnah Nongpyrshang ha ka iingkmie ki Sistar Loreto ha Rathfarnham, hajan Dublin (Ireland). Na ka bynta jong ka shimet ka la long ruh kaba pait mynsiem ban iehnoh ia la ka jong ka shnong bad ka rympei iing. Hynrei ka la skhem ha la ka jong ka jingmut jingpyrkhat. Haba pyrkhat shaphang kito ki sngi ka la ong :

“Hapdeng 12 bad 18 snem ka rta, nga khlem kwah ban leit long sistar. Ka iing ka sem jong nga ka la long kaba suk-kaba kmen bha. Hynrei haba nga la dap 18 snem ka rta, nga la raikut ban iehnoh ia ka iing ka sem jong nga ba ngan leit long sistar. Naduh kata haduh mynta kumne hi, la palat sawphew snem ngam ju artatien, wat shikhyllip-mat ruh ba nga la leh ia ka badei. Ka dei ka mon jong u Blei, ka long ka jingieid jong U.”

Ha Rathfarnham, ka Agnes ka la sah shisnem, ha kaba ka la khreh ia ka ktien phareng bad ka la ioh ruh ia ki jinghikai shaphang ki aiñ bad ki rul jong ka Jingiasyllok ha kaba ka da mut ban aiti kyntang ialade.

Ha u 'Naiwieng 29 tarik 1928, la pdiang ia ka sha kane ka jingiasyllok, bad hadien kata la phah ia ka sha India ban sah ar snem kum ka nobis, ban pynlut ia la ka jong ka por ha ka jingduwai, ka jingpuson bad ka jingpynkhreh ialade. Hangne ka la ioh por ban kjit ia ki aiñ bad ban sngewthuh ruh shai kdar ia ka mynsiem jong ka jingiasyllok.

Ka Agnes, ka la shim ïa ka jingsmai ban im duk, ban im sotti, bad ban im kohnguh ha u snem 1931. Dei ha kane ka por ba ka la shim kyrteng thymmai ruh ïalade. Ym dei shuh Agnes, hynrei Teresa – ka dak ka shin bapaw ba ka jingim thymmai kan sdang ha ka.

Ka la teh ïalade da kine ki jingsmai na ka bynta shisnem, bad ka la dei ban pynthymmai pat ïa kane ka soskular man la u snem haduh u snem 1937 ha kaba ka la smai ban rakhe hok ïa katei ka juban lak shi jingim.

Mar ïa dep kane ka jingsmai kaba khatduh, la phah ïa ka sha ka High School Loreto kaba don ha Entally (Calcutta). Hangne ka la hikai Histori bad Geography palat arphew snem. Hadien ka la long ruh ka Headmistress ha kane ka juh hi ka skul.

Ha Entally, ka Mother Teresa ka la pawnam bha kum ka nongpynïaid kaba tbit bad ka nonghikai kaba kynsai. Ki khynnah skul baroh ki la ieid thep mynsiem ïa ka. Ha Entally, ka la seng ïa ka jingïa-syllok Sodality hapteng ki khynnah Bengali kumba ju don ha ka shnong jong ka. Da ka jingïarap lem jong u Phadar Henry ki la leit jngoh ïa ki Aspata, bad ïa ki slum – ban sam ïa ka jingieid jong u Krist ha ki.

**Nga long kum  
u LET  
ha kti u Blei.**

**- MOTHER TERESA.**

## **2.**

---

### **U BLEI U KDEW LYNTI**

Ka Mother Teresa bad ka Seng Missionary of Charity kin ïai kynmaw sngewieid borabor ïa ka 10 tarik u 'Nailur 1946, kum "Ka Sngi ka Jingpyrsad Mynsiem" bad kum "Ka Sngi ka Jingkut Jingmut", namarba dei ha kane ka sngi ba ka la ïoh ïa ka Jingkhot bakyrpang na u Blei. Ka la shemphang halade shimet hi ba ka jingsuk ka jingshngaiñ ha ka konben ha Entally ka la long kaba pyrshah ïa ka jingthrang jong ka ban wan sha India.

Ma ka hi ka la ong : "Ka la long ha ka 10 tarik u 'Nailur 1946, ha ka rel kaba la kit ïa nga sha Darjeeling, ha ki sharing lum Himalaya, ba nga la ïohsngew ia ka jingkhot jong u Blei. Ka Khubor ka la long kaba shai : Nga dei ban iehnoh ïa ka konben bad ban ïarap ïa ki baduk katba nga dang don hapdeng jong ki. Ka la long ka Hukum ! Nga tip ba nga dei ban leh aïu, hynrei ngam tip pat da kumno ngan poi shata."

Ka Mother Teresa ka la sngewthuh shai ba u Blei u kwah ïa ka "Ban shakri ïa U hapdeng kiba duk tam

na ki baduk baroh"; kiba shah iehbein, ki baduk, ki ba im ha ki slum bad ki briedu ki bym don iing don sem. U Jisu u la dawot ia ka ban bud ia U sha ka jingduk kaba shisha kumba im ki million ngut ki riewduk jong ka Ri.

Ka la pynshai ia ka jingsngew jong ka kumne :

"Ka India ka donkam ki Teknishian, ki saiantis, ki Ekonomis, ki doktor bad ki briedu kiba phikir ia ka jingkoit jingkhiah khnang ba ka Ri kan kiew irat shaneng. Ka Ri ka donkam ki saiindur, bad ka donkam eh ia ki jingbahkhlich-lang ha ka trei ka ktah. Hynrei haduh katno por ki briedu ki dang dei ban ap khnang ba kine ki saiindur baroh kin pynpaw ia u soh ? Ngim tip ! Ha ka juh ka por ki briedu ki dei ban im, ki dei ban iohbam iohdih, ki dei ban ioh ia ki jingsumar, ki jaiin ki nep ban phong. Ka phang jingtrei iong nei, ka dei na ka bynta ka India kaba mvnta. Katba hane ka rukom jinglong jong ka Ri ka dang sah, ka iingtrei jong nei ruh kan dang long kaba mvntoi bad kaba donkam."

Da ka jingshynrang mvnsiem bad da kaba shaniah tvlli tvllan ha u Blei, ka la raikut ban sympa sha ki thwei iingim bathvmmmai.

Mar ia poi sha la ka konben, ka la iathuh ha ki bahalor ia la ka jong ka jingangnud. Da ka jingiarap bad ka iingkitkhlich jong u Archbishop Perier jong ka Calcutta, ka la ioh ia ka jingbit bakvrpang na Rome ban iehnoh ia la ka konben bad ban sdang ia ka jingtrei bathvmmmai jong ka. Ki Bahalor jong ka ha ka jingiasvllok I oreto ki la sngew ba ka jingleit noh jong ka Mother Teresa ka long ka jingduh kaba khraw, hynrei ki khlem khanglad-khang lynti ia ka.

Pynban, ka la ioh ia kine ki kyntien na ka bahalor duh jong ka Seng jong ka, haba ka la tip ia kane ka jingthmu bariewblei jong ka :

"Lada kane ka long ka mon jong u Blei, ngam lah ban khanglad hynrei nga aibor ia phi ban shu jam beit shaphrang ha kaei kaba phi thmu. Borabor kynmaw ba phin ym duh noh ia ka jingieid bad ka jingñiew burom jong ngi ia phi. Lada shisien ka sngi, namar kino kino ki daw, phi pyrkhat ban wan phai bian, ngin pdiang sngewbha ia phi sa shisien pat kum ka para jong ngi."

U Archbishop Perier u la thoh sha u Kpa Bakhuid kumba teh ka Aiñ Balang ha u Rymphang 2 tarik, 1948, kata ka la long kumba ar snem hadien ba ka Mother Teresa ka la pynpaw ha u ia la ka jong ka jingangnud. U Pope Pius XII u la jubab ia kane ka shithi jong u Archbishop Perier ha u Iaiong 12 tarik, U da aibor ia ka Mother Teresa ban mih noh na ka jingiasyllok ki sistar Loreto, khlem da weng noh ia ki jingsmai ba ka la khlei ban im duk, ban im sotti bad ban im-kohnguh shi jingim. "Khnanng ba kan lah", la pvnshai ka shithi u Pope, "ban aiti lut ialade ha kaba shakri ia ki baduk bad kiba donkam, bad ban lum sawdong jong ka ia ki lok ki jor kiba mon ban ia trei lang ia ka juh ka jait jingtrei." U Kpa bakhuid u da buh ia ka hapoh ka jingpyniaid jong U Archbishop ka Calcutta.

Ka Mother Teresa ka la khot ia kane : "Ka Jingkhot jong u Blei halor kawei pat ka jingkhot."

Ha u 'Nailar 9 tarik 1948, ka Mother Teresa ka la mih noh na kane ka konben kaba dap da ka jingsuk bad ka jingshngaiñ suda.

“Ban mih noh na Loreto, ka la long ka jinglen ialade kaba khraw tam ha ka jingim jong nga. Ka la long kaba kham eh shuh shuh ban ia kaba iehnoh ia ka iing ka sem ne ka ri jong nga ban rung ha kane ka jingsyllok riewniam. Ka Loreto ka long ka bneng na ka bynta jong nga. Ha Loreto nga la ioh ia ki jinghikai mynsiem kiba paka; Nga la long ka riewniam ha kane ka seng. Nga la aiti Kyntang ialade ha u Jisu ha kane ka jingiasyllok. Nga la sngewtynnat bha ia ka kam jong nga ban hikai ia ki khynnah”.

Ka Mother Teresa ka la loit noh ia ki jaiñ sistar kiba dei jong ka Loreto, ka la mon ban shu phong da ka sari kaba lieh kaba don da u hem uba blue. Ka la iehnoh ia ki juti baremdor bad ka la phong da ki slipar sandal, bad ka la deng ia u diengphna ha ka tyrpeng kadiang. Ha pla pat ka la rah pisa tang kat ban dap ban sdang ia ka jingtrei jong ka. “Ka la long kaba kham eh shuh shuh”, ka la ong, “ban ia kaba iehnoh ia ka iing ka sem jong nga haba nga la rung sha konben. Hooïd, haba nga la mih noh na konben nga khlem shu phet noh jyndat ban ioh ia ka jingim kaba kham laitluid.”

Ka la iehnoh ia ka jingshngaiñ jong ka konben, ka jingieid-jingthoiñ, ki jingiarap ba tei mynsiem, bad ka la bret ialade da ka jingngeit kaba skhem, khlem kylli-khlem tohkit, khlem tip khlem bna ha ki ksangkti bakhlaiñ bor jong u Blei uba la pasiaw ha ka.

U Phadar E. Le Joly, S.J. U long uwei na kito ki lyngdoh kiba ka Mother Teresa ka ju plie ia ki khulpi ka dohnud jong ka. Une u lyngdoh u long ruh u Nongsharai bad u nongkynpham mynsiem ia ki sistar



jong ka. 'Marwei ha surok', la ong Ka Mother Teresa ha u E. Le Joly, 'Khlem iing khlem sem, khlem lok khlem jor, khlem nongiarap khlem nongsynran, khlem pisa khlem pilaiñ, khlem kam khlem jam, khlem don jingkular, khlem boina, ka la shu duwai phirat marwei "Ko Blei jong nga, ha Me, bad tang ha Me, Nga shaniah tylli ha ka jingkhhot bad ka jingpyrsad mynsiem jong Me. Wat shah ia nga ba ngan shu pulom ei."

Ka kyrdon kaba nyngkong ba ka Mother Teresa ka la shim ka long ban leit pyntbit shuwa ialade ha ki phang kiba iadei bad ka jingkoit jingkhiah, khnang ba kan lah ban iarap ia ki bapang bashitom kiba bun kynrei ha ki slum. Kumta ka la leit sha Patna (Bihar) sha ka Holy Family Hospital ba la pyniaid da ki sistar ba la khot Medical Missionary sisters. Ka la shong la sah bad ki 4 bnai. Nangne ka la ioh ia ki jinghikai ha ki phang babun, kiba lah ban iarap bad kyrshan ia ka jingtrei jong ka.

Ha ka sngi Peitngor Kristmas' 1948, ka Mother Teresa ka la leit phai biang sha Calcutta ban sdang ia ka jingtrei na ka bynta ki baduk tam na ki baduk baroh, da kane ka jingraikut ba "Lada uno uno ne kano kano ka briew ki sngew ba u Blei u kwah ia u ne ia ka ban pynkylla ia ka jinglong ka imlang-sahlang, kata ka dei ka kam tang hapdeng u Blei bad uta u briew shimet. Baroh ki don ia ka deiti ban shakri ia u Blei ha ki lynti kiba U Blei u khot ia ki. Nga hi shimet nga sngew ba U khot ia nga ban iarap ia ka longbriew bashimet, ban ieid ia u briew uwei pa uwei, ym ban pynbunkam ialade da kaba shahteshahkhum ha ki iing skul."

Haba ka Mother Teresa ka la sdang ia kane ka kam, ka la don tang san tyngka ha pla.

Mar shu ia iuh kjat ha Calcutta ka la sdang ban leit jngoh ia ki slum ha Teljala bad Motijhil, bad shen ka la plie ia ka skul ha Motijhil ha ka 21 tarik, u Nohprah 1948, na ka bynta ki khynnah baduk bym don lad.

"Katba nga dang iaaid najan ki slum ka Motijhil, kawei na ki slum kiba shyrkhei duh, ha kaba ngi don katto katne ngut ki katholik," la iaathuh u Phadar Henry, 'Nga la iohsngew ia ka sur kaba kynnoh-sa-kynnoh ia ki dak alphabet Bengali banyngkong. Nga la jngoh tuh shapoh bad nga la iohi aiu ? Ka Mother Teresa ka ba dang hikai ia ki khyndiat ngut ki khynnah rit. Ym don shuki, ym don miej, ym don black-board, ym don shok Da u dieng ka la pruid ia ki dak ha madan. Hadien kata pat ka la leit jngoh ia ki iing ki sem, ki baduk bashitom, ki tymmen ki kro bad ki khunlung ki khynnah kiba don ha kata ka slum.'

Ha ka por miet ka la leit sah ha St. Joseph's Home jong ki Sisters of the poor kiba trei na ka bynta ki tymmen ki kro, bad ki bym don iing don sem shuh.

Ym slem hadien ka la leit shong wai noh ha iing jong uwei u ophisar Katholik uba kyrteeng u Michael Gomes khnang ban pynsuk ia ka leit ka wan jong ka.

Ar bnai ka Mother Teresa ka la trei marwei bad suki suki haba ka la iohmad ia ki jingeh ka jingsngew marwei, ka jingiar ka trei ka ktah, ka jinglong ba jngut ka imlang-sahlang ka la sngew dumbuit hi thlim. Haba pyrkhat shaphang kito ki sngi ka ju ong:

"Nga ju don ka jingsngew ba katno ka long kaba khia ka jingduk jong ki. Katba nga dang wad iing, nga ju iaaid khlem tip shano ngan poi, haduh ba ki kti bad ki kjat jong nga ki sdang ban lwaid da ka jing-

thait-jingjrem. Nga la shu pyrkhat ha lade katno ki dohnud bad ki met jong kito kiba wad iing, wad jingbam, ne wad jingkoit jingkhiah ki pang da ka jingsngewsih. Ka jingkynmaw ia ka Loreto ka ju long bunsien ka jingpynshoi ia ka mynsiem jong nga. Nga la bthat noh ialade na kane ka jingdukha mynsiem da ka jingduwai kaba mih naduh ki krem bajylliew ka mynsiem jong nga : "Ko Blei jong nga, Nga la jied mon sngewbha namar nga ieid ia Me. Nga thrang ban iaineh skhem ha kane ka jingraikut jong nga bad ban leh tang ia ka mon jong Me. Aibor ia nga mynta ha kane ka khyllipmat".

Khyndiat sngi hadien, ha u bnai Lber 1949, ka Mother Teresa da ka jingsngewkmen ka bym lah ong shuh ka la pdiang sngewbha ia kawei ka khyannah skul jong ka, ka Subhasini Das sha ka kynhun jong ka. Kane ka la long ka dak banyngkong ba u Blei u da, u peit ieid bad u kyrkhu kyrdoh ia kane ka jingtrei jong ka.

"Kan long ka jingim kaba eh; Hato phi long kaba la khreh?" la kylli ka Mother.

"Nga tip ba ka long ka jingim kaba eh; Nga long kaba la khreh!" La jubab shlur kane ka theilud.

Da ka jingsngewhun mynsiem bad ka jingsngewnguh ia u Blei, ka Mother Teresa ka la duwai :

"Ko Jisu baieid, Me long da shisha u babha. Me la phah ia ki ! Me hi keiñ, to bat ia la ka kular — Ko Jisu baieid, khublei shibun na ka bynta ka jingbha jong Me."

Ka Subhasini Das ka la shim kyrteing thymmai da ka kyrteing baptisma jong ka Mother. Mynta la khot ia Ka Ka Sister Agnes.

Suki jai ka kynhun jong ki ka la sdang ban pait-pnat-paitshang. Haba kren shaphang ki samla kiba kloi ban aiti lut ialade na ka bynta ki baduk, ka Mother Teresa da ka jingkmen bad da ka jingkyrmen kaba skhem ka la ong :

“Ki khynnah samla, ki kwah ka jingim ban duwai, ka jingim duk, ka jingim sngewrit, ha kaba bud dien ia u Jisu ! Hato kane kam long kaba phylla ? Ba ka wan jia ha ka por ba kiwei pat ki uxor ba don ka jingduna ha kaba bud ia ka jingkhhot u Blei bad ki ong ba ki samla ka mynta kim long kiba la khreh ban im sngewrit, ban im duk, bad ban kohnguh. Nga hi ngam shem ciei kiba kum kita. Kyntu ia ki ban leh ia kaei kaei kaba kham eh na ka bynta u Jisu, kin jam shaphrang da ka jingshlur.”

**"U Tagore u la thoh :  
'Hangta ki kjat jong Me  
ki jahthait,  
Ha ka jaka ba im  
Ki baduk tam,  
Ki bapoh tam  
bad ki ba la jah !'  
Dei hangta ba phin shem  
ia ka Mother Teresa."**

**—INDIRA GANDHI**

### **3.**

---

#### **KA DAW KA JINGIEID**

"Ha kaba jied ia ka jingtrei jong ngi", la ong ka Mother Teresa "Ngim don ia kano kano ka saifidur ne ka jingmut ba la ruid dak lypa. Ngi la sdang ia ka jingtrei jong ngi katkum ka jingdonkam kaba mih. U Blei U la pyni ha ngi ia kaei kaba ngi dei ban leh."

Haba kylli ia ka shaphang ka jingtrei jong ka, bunsien ruh khlem da pyrkhat ka ju mlien ban ong :

"Nga la sngew thikna nangta bad nga dang iai sngew thikna ruh ba u dei u Blei, ym dei manga kaba leh ia kane ka kam. Ngam shym la don ka jingsheptieng naduh kaba sdang. Nga la tip skhem ba lada ka dei ka jingtrei jong nga kan iap lang bad nga. Nga la tip ba ka dei ka jingtrei jong U bad ba ka dei ka kam jong U, kumta kan iai im bad iai sei shibun ki soh."

Kumta da kaba shaniah ha u Blei ka la lah ban leh bun ki kam kiba ka pyrtnei da ka spah ka phew jong ka, da ki stad pyrkhat jong ka kam lah ban ia kob. Kine harum ki long ki kam kiba ka la sdang bad ka la leh :

## KI SKUL

Naduh ki por ba ka Mother Teresa ka dang don tang marwei hi, ka la sdang ia i skul rit ha ka slum ha Motijhil na ka bynta ki khun jong ki nongsar surok, ki nongtrei rel, ki khun baduk, bym don lad don lynti. Haba sdang, la don tang san ngut ki khynnah skul bad hadien khyndiat por ka la nangiar bad nangroi shuh shuh.

“Nga hikai ia ki”, ka la ong, “ia ki dak alphabet bad ruh kumno ban sait bad ban sad ia u shuih. Nga ai ia ki shi dak ka sabon kum ka prais na ka bynta kito kiba wan tista, kiba shahshkor bad kiba pyrshang ban leh khuid. Nangta ki ioh dud ruh ha ka por shiteng sngi.”

Haba pyrkhat shaphang kito ki sngi da ka jingphuhsamrkhie ka ju pyrto ieid :

“Ya kito kiba jakhlia, nga ju sait pynkhuud ia ki ha ki top kiba don hangta. Nga ju hikai niam hadien ba nga la hikai ia ki shaphang ka jingkhuid – ka jingsuba. Nga ju pyndonkam ia ka madan kum ka blackboard. Hadien ka suh ka thain ngi ju leit jngoh ia ki bapang kiba shitom.”

Da kane ka rukom ka la pyrshang ban kyntiew ia ki baduk, ban pynsgew ba ki long kiba kordor bad kiba don ia ka main longbriew ha khmat ka pyrtnei.

Ha u snem 1967, 17 tarik u 'Naiwieng, ka la plie ia kawei ka skul miet ha ka ktien Bengali na ka bynta kito baroh ki bym don lad, ki ba hap leit wad jakpoh ha ka por mynsngi. Ia kane ka skul la khot ka Protima Sen School. Ha u snem 1968 pat ka la plie sa kawei ka skul miet ha ka ktien Phareng ha ka nongbah Calcutta hi da ka juh ka jingthmu.

## KA NIRMAL HRIDAY

Ha kawei ka sngi, hajan ka Nilratan Sarkar Hospital, ka Mother Teresa ka la iöhi ia uwei u briew uba thiah harud surok. Ka la lyngngoh ban tip ba ka aspata kam shym la paiñ ia u hangta. Ka la leit sha ki dukan die dawai bamarjan, bad kat ba kan da wan phai, uta u briew u lah da dkut mynsiem. Ka Mother Teresa khlem da buhrieh ia la ka jong ka jingsngew ka la ong: "Ki sumar ia ki ksew bad ki miaw palat ban ia ki parabriew." Nangta ka la leit sha u Komi-shoner ki pulit ban uxor pyrshah ia kane ka jinglehsat ia ki mynsiem briew. Dei kane ka jingshlur jong ka kaba la plie suki suki ia ki irmat jong ka sorkar ban phikir bad ban bniah ia ka jingim briew.

Kum kine ki jingjia kim shym long kiba jia shisien lano. Hynrei, jan man ka sngi ki baduk ki shu iap namar bym don ba pyrwa.

Ha kawei ka sngi ha u snem 1952, katba ka Mother Teresa ka dang iaaid lyngba ki surok ka nongbah kumba ka ju leh, ka la lyngngoh hi ngaiñ ban lap ia kawei ka briew kaba thiah hapoh ka jaka theh jakhlia harud surok, kaba la shah shrut shiteng ha ki khnai bad ba la sop da ki dkhiew shiryñieng.

La i thik kum kawei ka met iap. Ka Mother ka la iohsngew ia ka jingud iamrem jong kata ka brieve :  
“Wow ! Balei kumne ia nga”, ka la jaw ummat duh mynsiem “da u khun jong nga un wan bret bein ia nga shane.”

Ka Mother ka la shim bad rah ia ka sha ka aspata, hynrei ym shym don ba pain jaka ia kane ka rangli. Da ka jingiaiban jong ka, khatduh-khatwai ki la pdiang. Tangba ym slem ba kata ka longkmie ka la khlad noh.

Ka Mother ka la mih noh na kata ka aspata da ka jingsngewkhia mynsiem bad ka la leit beit sha ka ophis jong ka Munisipal ban kyrpad ia ki ban ai ia ka wat tang shi kamra ruh ban sumar ia kito kiba wat ka aspata ruh ka khnium ban shim. Ki bapli ki bym don tnum ban rieh kin leit shano ?

Khatduh khatwai ki la ai ha ka ia kawei ka krung jong ka Darmashalah (ka jaka shongthait jong ki pilkrim hindu) kaba don marsyndah bad ka Tempel jong ka blei Kali. Ka Mother ka la ai kyrteng ia kata ka iing “NIRMAL HRIDAY” kaba mut “ka Dohnud batlem.”

“Nga la sngew kmen haduh katta katta ban ioh ia kane ka jaka namar ki daw kiba bun, khamtam eh ban tip ba ka long ka pdeng jong ka nguh ka dem bad ka mane blei jong ki Hindu.”

Shen kane ka iing ka la dap smam da ki baduk-batoi kiba don ha tmier ka jingiap. Hangne ha Nirmal Hriday don 60 jynthiah na ka bynta ki shynrang bad 60 jynthiah na ka bynta ki kynthei. Naduh kata haduh mynta da ki hajar ki la rung hangta bad bun ruh kiba la iap noh hangta da ka burom ka hor-mot, bad ka kyrdan longbrieve kaba paka.



## KI JINGEH

Katba ki kam babha jong ka ki nangiaid sha-phrang, ka Mother ka la ia tyngkhuh ruh bad bun ki jingeh. Nyngkong nyngshap na ki sadhu jong ka Temple kiba ia don baroh lang kumba 400 ngut eiei. Ki la ong ba ka Mother Teresa ka la wan ban pynkylla niam ia ki Hindu baroh, ka da shlan ban sdang ia kata ka kam na ka jaka pdeng jong ka jinggeit jong ki.

Ki sadhu ki la leh katlah katiai ban ioh weng noh ia ka nangta da ka bor ne wat da kaba pyniap noh ruh ia ka bad ia ka jingtrei jong ka lada donkam. Haba ka la iohsngew ba ym dei tang ma ka hynrei ki bapang bashitom ruh ki don ha ka jingsyier ka jingma kaba khraw, ka la leit iakynduh ia u Sadhu rangbah bad ka la ong :

“Lada phi kwah, phi lah ban pyniap noh ia nga hangne mynta mynta, hynrei wat lehsniew eiei ia kine baroh kiba don ha tmier ka jingiap.”

“Ha kawei ka step,” ka la iathuh da kaba phuh-samrkhie, “Katba ngi dang pynsum pynsait ia ki nongpang uwei u sadhu na tempel u la rung. U la dem lyngngon hakhmat jong nga, u la ktah ia ki kjat jong nga da ki kti jong u bad u la pyndei ha la ka jong ka khlieh. Nangta u la ieng bad u la ong ‘La laiphew snem mynta ba nga la shakri ia ka blei Kali ha kane ka tempel jong ka. Mynta, kane ka ‘Lei Kmie ka ieng hakhmat jong nga ha ka dur briew. Ka long ka bok jong nga mynta ka sngi ban ioh nguh ioh dem ia kane ka kmie kaba don hakhmat jong nga.’

“Naduh kata ka sngi,” ka la nang bteng, “ngi la ia long paralok. Bad ka jingialong lok jong ngi ka la

nang skhem shuh shuh haba uwei na ki sadhu u la ioh ia ka jingpang T.B.; Ym don aspata ki ban pdiang ia u. Ngi pat ngi la leh kat kaba ngi lah ei ban pynkoit ia u."

"Ki lok jong u ki la ju wan jngoh ia u. Dangsdang u nongpang u la ju kren bein blei namar ka jingsngew dukha mynsiem jong u. Hynrei kane ka khlem pynlong ia ngi ban jngai na u. Suki suki U la sdang ban kylla, haduh ba u la kloi ban pan jingkyrkhu na ngi shuwa ba un dkut mynsiem ha ka jingjaijai."

"Ki lok jong u ki khlem peiphang eiei shaphang kaci kaba la jia. Hynrei naduh kata ka khyllipmat ki la kham ia jan bad kham sngewieid ia ngi, ki da kloi ban iarap lem ha ki jingdonkam jong ngi."

Ka jingeh kaba ar ka la mih na ka liang jong ka Munisipal kaba la pyrshah ia Ka, ba ka la seng ia ka Jing jong ka ha ka jaka ba la kyntang jong ki Hindu. Hynrei kane ka la shu iaaid lyngba kum ka lyer kaba shu wan - shu leit.

Khyndiat ngut ki nongpynkhih pyrtnei ki la pyrsang ban pynkhihwin pyrshah ia ka. Hynrei shu pulom ei. Uwei na ki nongialam haba u la wan jngoh da la ki jong ki khmat ia ka Nirmal Hriday u la ong : "Nga kular ba ngan weng noh ia kane ka briew (Ka Mother Teresa) nangne, bad khlem pep ngan sa bat ia la ka jong ka kular. Hynrei, shahshkor bha ia nga ! Ngan ym leh eiei ban weng noh ia ka nangne lynda phi wan ialam ia ki kmie bad ki hynmen ki para kynthai jong phi ban leh ia ka kam kaba kine ki sistar jong ka ki leh. Ha Tempel phi don ia ka blei kaba la shu thaw da u maw, hynrei hangne phi iohi ia ka blei

kaba im." Da kane la kut ka ïania shaphang ka jingdon ka Mother Teresa ha Nirmal Hriday.

Ka Mother Teresa ka khlem don ïa kano kano ka jingsheptieng ne ka jingartatien, hynrei ka la ïohi ha kine kiei kiei ïa ka kti bakhlaiñ bor jong u Blei.

"Nga, ngam long eiei. Ma U, u long kiei kiei baroh. Nga ngam leh eiei dalade hi. Ma U u leh lut."

## KA PREM DAN

Ha u snem 1975 pat, ka la plie sa kawei ka ïingthymmai kaba ka la ai kyrteng Prem Dan. Kane ka dei ka ïing na ka bynta kito ki briew kiba dang i don lad ban koit ban khiah biang. Hangne ka sumar ïa ki nongpang tat haduh ba kin da lah biang ban ïaid ban teng bad ban leit trei leit ktah. Kumba ka ong :

"Ya kito ki ba lah ban trei ban ktah ngi pyrshang ban shem jingtrei na ka bynta jong ki. Kiwei pat ngi pyrshang ban phah biang sha ki ïing jong ki khnang ba kin lah ban pynleit ïa ki sngi ba khatduh jong ki ha la jingsuk bad ka jingkmen."

Ka Prem Dan ka long ruh kum ka kynja ïing na ka bynta kito baroh kibym don tnum ban shong rieh tngcn.

## KI SOH JONG KA JINGTREI SHITOM

"Ngi puson man la ka sngi shaphang ka jingïap. Ka long kaba sngewhun ban ïohi ba kine ki briew ki ïap da ka burom, ki phalang da ka jingkmen namarba ki tip ba kin leit phai biang sha Uta Uba pynlong pynman ïa ki bad uba da ieid eh ïa ki. Kito kiba don bunspah bunphew, kiba don ki mar ki mata bad ki

lak ki putit, ki bunkam ha kaba pyrkhat shaphang jong ki. Ki pyrkhat ba kaei kaba kongsan tam ka long ka spah pyrthei. Kata ka pynlong ia ki ban sngew eh ban ieh noh ia kiei kiei baroh. Katno ka khamsuk ia ki baduk kiba laithluid, namarba ka jinglailuid jong ki ka nang ailad ia ki ban ieh noh ia kane ka pyrthei da kaba suk."

Ka jingiap suk jong ki baduk-batoi, ki bashah ieh beif-ieh khoh, ka long kawei na ka daw ka jingkmien bakhlaif duh jong ka, kumba ka ong :

"Ka jingiap kam long eiei, ka dei tang ka lynti kaba suk tam bad kaba stet tam ban leit phai sha u Blei. Lada ngi lah tang ban shu ngeit, lada ngi lah tang ban shu pynsngewthuh ia ki briew ba ngi wan na u Blei bad ngi dei ban leit phai biang sha U ! Man la uwei pa uwei u briew u tip ba ngi khlem thaw ialade. Don Mano re, Uwei pat, Uba la ai jingim ia ngi. Ban leit phai sha U, ka long ban leit phai sha la iing."

Ka long kaba sngew myllung bad kaba sngewktah shibun ban iohi ha ki khmat ba la jan lip rong ia ka jingkmien bad ka jingphuhsamrkhie.

"Ha ki 21 snem," ka la ong, "nga la tam palat 28 hajar ngut ki briew na ki surok ka Calcutta. Bun napdeng jong ki ki la iap, ka jingiap kaba ithiang. Kum uto uba ngi la tam na surok shuwa ba un iap u ba la ong : 'Nga la im kum u mrad, hynrei ngan sa iap kum u angel uba ioh ia ka jingieid bad ka jingsumar na ki sistar.'

"Nga la tam ruh sa kawei pat ka briew kaba dei ka long kmie ka bym shym la ioh bam ioh dih; hadien ba nga la pynsum pynsleh ia ka, nga la buh hakhmat

jong ka shipliang ka ja. Ka la shu shong bad peit-sa-peit ia kata ka pliang ja. Nangta nga la kren ia ka ha ka ktien Bengali bad nga la khroh la kyor ia ka ban bam. Hadien shiphang ka la ong ha nga : 'Ngam lah ngcit ba kane ka dei ka ja. La slem ba ngam ju iohi ja.' Ka la bam ia kata ka ja bad khyndiat por hadien ka la khlad noh."

Bunsien ka Mother Teresa bad ki nongtrei jong ka ki la iohbor na ka mynsiem sngewnguh kumba la pyni haneng. Kaba kham ktah shuh shuh, ka la jia shisien ia uwei u nongkhrong uba ka Mother ka la tam na 'liew kharai. Haba pynsum pynsait ia u, ka la shem ba la boi ksain lut ka met ka phad jong u. Ka doh jong u ka la sdang ban hap bad ban sma pyut. Ha ka jingtipbriew kaba shipor, Uta u nongkhrong u la kylli :

"Balci phi la leh haduh katne katne na ka bynta jong nga ?"

"Namarba nga icid....." ka Mother Teresa ka la jubab.

Uta u briew da kaba phuhsamrkhie u la khapbrip ia la ki khmat bad u la iohthiah suk ha ki kti jong u Blei.

## KI KHUNSWET

"Ngam sngew ia hap jingmut," Ka Mother ka la ong, "bad ki briew kiba ong ba la bun than ki khunlung ha Ri India. U Blei u pyndap ia ki syntiew bad ia ki sim, bad ia kiei kiei baroh kiba u la thaw. Bad kito ki khunlung rit ki long baroh ka jingim jong U. Ngim lah ban ong ba ki don bun ngut than."

Ha Calcutta hi man ka sngi ngi lah ban shem ia ki khunswet, ki khunlung ba shu shah bret ha ki nala bad ki jaka theh ñiut, ne wat ha khmat ki iingmane ruh.

Da ka jingsngew pangnud ka Mother ka la plie ia ka SHISHU BHAWAN, ka iing na ka bynta ki khunlung khynnah. "Ki nongpynkha Khunlung," Ka ju ong, "ki wanrah ia ki sha ngi naba ki kmie ki tait-khun ia ki. Ki aspata ruh ki phah ia ki sha ngi. Ki kali Munisipal ruh ki wan kit ia ki khunlung babun. Don ki por ba ki kmie jong ki ki shu wan bret ia ki khunlung bapli ha ka shyngkup iing jong ngi myn-step. Ngì pat ngi lum ngi lang ia kine ki khunlung baroh. La wanrah ia ki da kino kino ki lad ne namar kino kino ki daw; haduh mynta ngim pat ju kyntait ban pdiang wat ia iwei ruh i khunlung." Teng teng ki kmie ki kpa ki da wanrah khnang ia ki khunlung namarba ki long kiba anna. Hynrei bun na ki khynnah ha Shishu Bhawan ki long tang ki khun pongka, ki khun kliar, ki khun ba ki samla ki ioh shabar ka jingkyntiew kurim, ki bym kwah ban pynpaw pyr-thei ia la ka lanot ha ka sngewbha.

Ka Mother Teresa ka ñiewkor-ñiew burom shibun eh ia ka jingim briew, ka jingim kaba sdang naduh ka kpoh jong ka kmie haduh ka khyllipmat bakhat-duh jong ka jinglong tymmen.

"U Krist u la ong ba ngi long kham kordor ha-khmat u Kpa bneng ban ia u phlang, ki sim bad ki syntiew ha lyngkha. Namarkata, lada u sumar sukher ia kine kiei kiei, katno shuh un sumar ieid ia ka jingim kaba u la buh ha ngi. Um lah ban thok ia ngi, namarba ka jingim ka long ka jingaisngewbha ba-

kordor tam jong u Blei ia ngi, kiba U la thaw la ka dur ka dar jong U, kiba long ki jong U. Ngim donhok ban pynjutor ia ka."

Haba kren shaphang ka jingpynduh khun, da ka jingiam rem ka la ong :

"Ngam kubur ia ka jingpynduh khun la ka long kaba dei aif ne kaba be aif. Nga ngeit skhem ba u briew un ym lah ban rah ia la ka jong ka kti ha kaba pyndkut ia ka jingim. Baroh ka jingim ka long ka jingim jong u Blei ha ngi. Bad wat i khunlung i bym pat kha i don ia ka jingim jong u Blei ha i. Ngim don hok da lcilei ban pynduh noh ia ka jingim da kino kino ki lad, u briew, ka briew ne i khunlung- Ym don jingiapher ! Nga shu sngew halade ba ka jingiam jong ki khunlung-bym-shym-la-kha ka poi sha ki shkor jong ngi, ki khunlung kiba shah pyniap noh shuwa ba kin iohi ia ka pyrtnei - Ka jinglynaiar - ka jingiam briew kaba poi hakmat ka khet u Blei."

Da kane ka mynsiem ban niewkor ia ka jingim briew, naduh ki khunlung barit, ka la seng ia ka Shishu Bhawan ha Calcutta - Ka iing ha kaba yn sumar ia ki khunlung ki khynnah kiba shah bret beif bad kiba anna.

Katba kine ki khynnah ki nangsang nangplung ha ka jingieid kmie jong ki sistar, la ai ruh ha ki ia ki lad ban nang ha ka thoh ka tar, ka pule ka puthe, da ka jingiarap lem jong ki sistar hi ne da kaba phah ia ki sha kiwei pat ki skul. Kito kiba kham koit kham khiah bunsien ki shah ting khun noh da kito ki bym don khun don kti ha India ne ha ki ri sepngi. Don na ki ynda ki la kham heh ki leit sha ki skul trei ban nang ia ki jait kam bapher. Don ruh bun na ki khyn-

nah kynthei kiba ioh ia ka jingkyrshan na ka sorkar ba kin lah ban pyndep ia ka jingpule jong ki ha ki skul bah.

Ki Nongiatrei lang jong Ka, ha kane ka kam kim long tang ki rangbah kiba la don ia la ka kamai kajih. Hynrei, wat ki khynnah skul ruh na kylleng ka pyrthei ki noh kylluid la i bhah barit na ka bynta ki khynnah barit bashah ieh bein jong ka Ri India.

Ki khynnah skul na Bilat ki phah sha ka Mother Teresa ia ka pisa ba ki la tyngkai bad kynshew khnang ba ki hajar ngut ki khynnah baduk ka India kin ioh bam ruti la kumno kumno shi nuid shi sngi. Ki Khynnah Skul ka Denmark ki leh kunai khnang ba ki khynnah baduk ka India kin ioh la kumno kumno shi klat ka dud shi sngi; Ki khynnah skul ka ri Germani pat ki leh pynshitom ialade khnang ba ki khynnah baduk jong ka India kin ioh la kumno kumno uwei u dawai khlain kapsul shisien shisngi. Ki khynnah skul na kiwei ki ri ruh ki leh kumjuh da ka mvnsiem ieid parabriew ha ki rukom barit ki bym da paw pyrthei.

‘Ngim donkam ban leh ia kiei kiei kiba khraw,’ Ka la ong, “ban pyni ia ka jingieid jong ngi ia u Blei bad ia la u paramarjan. Dei ka jingieid kaba ngi buh ha ki jingleh jingkam jong ngi, kaba pynlong ia ki jingtyrwa jong ngi kiei kiei kiba iphuh iphieng hakhmat u Blei.”

## KI NONGPANG NIANGLYNGKUT

“Nga tip,” la ong ka Mother Teresa, “ba haba nga ktah ia ki dkhot met ba sma iwtung jong u nongpang nianglyngkut, nga ktah ia ka met jong u Krist ha ka



juh ka rukom kaba nga leit pdiang ia U ha ka Yu-kharist. Kane ka jingskhem jingmut jong nga ban ktah ia u Krist ha ka dur jong u nongpang ñiang-lyngkut ka ai bor ha nga ia ka ba nga tharai ngan ym lah ban ioh nangno nangno."

Shaphang ka jingsdang trei kam jong ka na ka bynta ki nongpang ñianglyngkut, ka Mother Teresa hi ka la iathuh kumne :

"Ha u snem 1957, ngi la sdang da san ngut ki nongpang-ñianglyngkut, kiba la wan sha ka iing jong ngi namarba ki la shah bret beiñ na ki jingtrei jong ki. Ki khlem don jaka rich; ki la dei ban shu leit khrong. Ym slem hadien, la wan uwei u doktor ban iarap ia ngi, u Dr. Sen, uba dang don lang bad ngi haduh mynta. U la hikai ruh ia ki sistar jong ngi ha ka kam ban sumar ia kine ki nongpang, namarba u dei u Specialist ha kane ka phang. Hapdeng ki nongpang-ñianglyngkut don bun ngut ki briew kiba nang kiba stad, kiba don kiba em bad ki balah ki bai. Hynrei na ka daw jong kane ka jingpang, ki la shah beh noh na ka imlang-sahlang, na la iing-na la sem, da la ki jong ki kur ki kha, bad bun sien ruh da la ki jong ki khun ki kti ki bym kwah ban iohi shuh ia ki. Don napdeng jong ki kiba wan shaduh Bengal na ki thaiñ bashathie jong ka Ri India, bad ki nongpang na Bengal pat ki nang tur shuh shuh shatei ban jngai na la ki jong ki briew bad na ki jaka ba ki briew ki ithuh ia ki. Ngi don hapdeng ki nongpang-ñianglyngkut hangne ha Calcutta, ki briew kiba bit kiba biang ha ka imlang-sahlang. Hynrei na ka daw jong kane ka jingpang, ki im mynta ha ki slum, khlem don ba ithuh, ba ieid ne ba sumar sukher ia ki. Ainguh ia u

Blei ba ki sistar jong ngi ki don hangtei ban ieid bad ban ia long lok bad ki."

Ia ki bapang ñianglyngkut ki sistar ki ai ka jing-iarap bad ka jingieid kaba kyrpang. Ki briew bun-sien ki phet iap phet im na kine ki nongpang namar-ba ki tieng ioh ia bit. Namar da shisha don ka jait jingpang ñianglyngkut kaba ia bit bad kaba ma.

Haba poi ha ka khap ba ki kmie ki kpa kiba pang ñianglyngkut ki don ia ki khunrit, don kiba la ai jingmut kumne ia ka Mother Teresa :

"Hato kan ym long kaba bha ban pyniakhlad noh ia ki khun na ki kmie ki kpa jong ki ?"

"Kumno ka lah ban long ia u ba don jingim," ka la jubab, "uba la duh lut ia kiei kiei baroh da ka jing-pang ba un duh sa ia ka jingieid jong ki khun ki kti jong u ? Kumno keiñ yn pyniakhlad noh ia ki khun ki bym tip ia ka bneng ka khyndew na ki kmie ki kpa ba ki ieid, kiba namar kane ka lanot ha ka jingshisha, ki dei ban kham jan bad kham ia ieid."

Kaba kham kongsan ka long ban sumar-sukher bha ia ki ba kin ym ia bit, da kaba bud ia ka jinghi-kai jong u Dr. Hemeruchx uba na ri Belgium, uba la pyrshang katlah katiai ban ai ia ka jingsumar kaba kyllum ia kito baroh kiba pang khlem da phah ia ki sha kino kino ki jaka kyrpang, hynrei da kaba phah sumar hi na iing. U da kyrshan eh ia kane ka jingong jong ka Mother Teresa. Tangba ynda ka jingshitom ka la jur than te dei ban sumar kyrpang ia ki ha ki jaka ba la mang kyrpang.

Suki jai ka Mother Teresa ka la seng ia kawei ka kynja nongrit na ka bynta ki Nongpang ñianglyngkut ba la ai kyrteng. "Ka SHANTI NAGAR" – ka 'Nong-

bah ka Jingsuk' harudnong ka Calcutta. Kane ka lah ban kynthup kumba 500 iing eiei. Ya kane ka khyndew la ai sngewbha da ka sorkar India, bad la tei ia ka da ka pisa kaba ka Mother Teresa ka la ioh da kaba die noh ia ka kali kaba u Pope Paul VI u la ai sngewbha ia ka hadien ba u la pyndonkam ha ka yukharistik Kongress kaba la long ha Bombay ha u snem 1964.

Ha kane ka shnong, ki Nongpang ñianglyngkut kim shu shong jaituh, hynrei ki suh ki thaiñ, ki trei mistri, ki thaw maw it, ki trei ha ki kor shon kot, ki rep kba bad kumta ter ter. Da kaba ki leh ia kine ki kam ka jingsngewkhraw ha ka kyrdan longbriew ruh ka nang kiew. Kim sngew shuh ialade kum ki nongkhrong, hynrei kum kiwei pat ki briew kiba ioh ia ka bam da la ka jong ka umsyep.

Nalor kine ki kam ba ki trei ha ri India, ha ri Sepngi ruh ka Mother Teresa ka la plie ia ki iing na ka bynta kito kiba dih kyiad kiba dih kynja ba la khot Rehabilitation of Alcoholics and Drug Addicts!

Ha kawei ka sngi ka Mother Teresa ka la ong :

"Ki nongtrei Komunist ha Calcutta, khamtam kito kiba don ha ka dong Entally ki la kwah ban tip bniah ia ka daw ba ki sistar ki lah ban pyniadei bad pynieid briew. Balei ki baduk ki shahshkor ia ki sistar hynrei kim kheiñ snep ia ki komunist kiba kular ia ka jingsuk jingsaiñ ha pyrtnei. Ym don daw eiei. Ki sistar ki ialap bad ki da leh ruh ia kaba ki ialap da ka jingieid."

Ha kaba ia kren bad u Malcolm Muggeridge uba na Bilat shaphang ka jinglong bakyrpang jong ka jingtrei jong ka, ka la ong :

“Uwei u rangbah hindu u la ong ba ma ki bad ma ngi ngi trei ia ka juh ka kam na ka bynta ka im-lang-sahlang : Bad ka jingïapher hapteng jong ngi ka long, ba ma ki, ki trei na ka bynta kaei re kaei, katba ma ngi pat ngi trei na ka bynta jongno re jongno. Dei hangne keiñ ba wanrung ka jingburom, ka jingieid, bad ka jingaiti lut ialade. Mangi ngi aiti lut bad ngi trei na ka bynta u Blei, U Krist, bad dei na kata ka daw ba ngi pyrshang ban leh bha katlah katiai; namarba ka dei ka jingïakynduh bad u Krist ha ka jingtrei jong U. Ka dei ka juh ka jingïakynduh: ha ka por Mas bad ha ka Sakramen ha duwan ngi ioh ia u Jisu ha ka dur u kpu, hynrei ha ki slum ha ki met bator, ha ki khunlung ki khynnah ngi iohi bad ngi ktah ia u hi.”

Ya ka lynti, phi dei ban bud,  
Ka jingpang, phi dei ban klet,  
Ka khuri, phi dei ban dih,  
Ka jingsngewbha, phi dei ban len,  
Ya ka thong, phi dei ban im sngi.

– DAG HAMMARSKJOLD.

## 4.

---

### KA 'MAT KYLLIANG

“Nga tip lada ka jingtrei ka long ka jong nga, kan sa iap lang bad nga. Hynrei, namar ba ka dei ka jingtrei jong U, kan im bad kan seisoh shibun shah”, ka la ong.

Da shisha u Blei, uba la jied bad uba la mon ia ka ba kan phawer pyrthei ia ka jingieid jong u ia ki baduk, U la phah bun ngut ki nongtrei kynthei bad shynrang ban iasynrop sbun bad ka ha kane ka kam.

### KI SISTAR MISSIONARY OF CHARITY

“Iwei hadien iwei,” ka Mother ka la iathuh, “nadh u snem 1949, nga da iohi ba ki khynnah kynthei samla ki sdang ban ia poi. Ki la long ki khynnah skul jong nga. Ki la kwah ban aiti lut ialade ha u Blei,

bad ki la kyrkieh ruh ban leh ia kata. Ki la law noh ia la ki sari baremdor da ka mon sngewbha ban phong da ki jaiñ kiba khamtat dor. Ki la wan da kaba tip shai ba kane ka long kaei kaei kaba eh. Ki thei lud kiba dei na ka jait ka khong kaba don burom ki wan ban tyrwa ialade ha kaba shakri ia kine ki briew kiba shah banbeiñ. Nga kren shaphang ka jingpynkhihwin pyrthei. Ka jingkhihwin kaba khraw duh bad kaba eh duh kaba long ka jingpynkhihwin da ka jingieid."

Nyngkong eh, la poi ka Subhasini Das ha ka 19 tarik, u Lber 1949 ban iasyllok lang bad ka Mother Teresa ha ka jingtrei jong ka. Ka la pynkylla kyrteing ialade hadien kum ka Agnes. Suki jai ka rympei iing jong ki ka la nangphuh nangphieng bad ka jingtrei na ka bynta kiba duk ki batoi ka la nang iar haduh ba ka iing wai jong u Michael Gomes ha 14 Greek lane ka la khapngiah. Ha kata ka por ki la ia don lang kumba 26 ngut ki sistar.

Ha u snem 1953, U 'nai Rymphang, ki la leit shong ha ka iing thymmai ha 54 A, lower Circular Road kaba long haduh mynta-mynne ka iing kmie jong ka jingiasyllok ki Missionaries of Charity. Ha une u juh hi u snem 26 ngut ki samla ki la shim ia ka jingsmai banyngkong bad ka Mother ka la shim ia ka jingsmai bakhatduh kum ki riewdkhot jong kane ka seng thymmai.

Da ka jingshitrhem mynsiem ki la dem ngon ban duwai ia u Blei da ki kyntien u Phransis Asisi Bakhuid :

Ko Trai,

To pynlong ia nga u Atiar jong ka Jingsuk jong Me,  
Haei ba don jingia-isih,

Ngan rah jingieid;

Haei ba don ka jingbym ia sngewthuh jingmut,  
Ngan rah ka jingiamap kylliang jong Me;

Haei ba don ka jingiamut sniew,  
Ngan rah ia ka jingiasngewthuh jingmut;

Haei ba don ka jingbakla,  
Ngan rah ia ka jingshisha;

Haei ba don ka jingartatien,  
Ngan rah ka jingngeit;

Haei ba don ka jingsngewduh mynsiem,  
Ngan rah ka jingkyrmen;

Haei ba don syrngiew,  
Ngan rah jingshai;

Haei ba don ka jingsngewsih,  
Ngan rah jingkmen.

Ko Trai,

To pynlong ia nga ba ngan im-sngi

Ha kaba pyntngen,

ban ia kaba wad jingtngen;

Ban iai sngewlem,

ban ia kaba kwah sngewlem;

Ban ieid,

ban ia kaba khwan jingieid.

Namarba dei haba ngi klet ialade hangta ngin shem;

Dei haba ngi map, ba ngin ioh jingmap;

Dei haba ngi aiti mon ia la ka jingim ba ngin ioh  
ia ka jingim junom. Amen.

Hooïd ko Trai, nga kwah ban long kaba kloi, kaba kohnguh ban shah ialam ha ki kti jong Me.

U Phadar Le Joly haba thoh shaphang ka jingim jong kine ki khun ka Mother Teresa u la iathuh kumne :

'Ha ka lyiur 1968, ha Darjeeling, ka la don ka jingkyrkhu bad ka jingplie ia ka iingthymmai na ka bynta ki khunswet, ki badkoh, bad ki khyannah ki ba anna. U Bishop u la kyrkhu ia ka iing; bad u Lat ka West Bengal u la iarah shibun ia ka jingtrei jong ki Sistar. Ka Superior kaba la pyndep ia kane ka iing, ka la pyrkhat, lehse ! kan sa ioh shongthait khyndiat por; Hynrei em - Ka Mother Teresa kaba dang shu wan phai na ri America bad na ki ri iurop ka la wan-rah Khubor bakyrpang ruh na ka bynta jong ka :

"Sistar, nga kwah ba phin leit sha Aphrika ban sdang ia ka iing thymmai hangta."

"Lano Mother ?" ka la kylli.

"Tang mar ia ioh ia ka passport. Ngi don bun kiei kiei ban leh ha Aphrika", ka la jubab.

Sa ia kawei pat ka sistar ka Mother ka la ong :

"Sistar, phi dei ban leit sha South India".

"Lano Mother ?"

"La shibit janmiet, da ka rel kaba nyngkong ka ban leit shatai."

"Ngam shim por ban lum ban lang ia ki tiar ki tar", la ong kata ka sistar, "namarba ngim don eiei. Ngi long kiba la khreh hadien shiphew minit."

Kumta la pynkdang ia ki da ka jingkohnguh bad ka jingduk kaba shisha ha ka jingim kaba shimet jong ki, khnang ba kin lah ban sngewthuh ia ka duk, ka thngan, ka sliang jong ki briew kiba kin ia trei.



Namar da shisha, lynda ngi ñohmad hi dalade ña ka jingthngan ngin ym lah ban sngewthuh ña ka jingmut jong ka jingthngan; Lynda ngi ñam ngin ym sngewthuh ka mut aïu ban ñam. Haba ngim don pisa wat shi naia ruh ha pla, dei tang hangta ba ngin sngewthuh ka mut aïu ban long uba duk bad kumta ter ter da shisha nga ngeit skhem hi halade ba u nonghikai uba tbit tam ha ka jingim bashimet jong man la uwei pa uwei u briew dei shisha ka jingia-kynduh (Experience) jong u ha ki khep jingim bapher.

Ki Sistar ka Mother Teresa ki riam duk :

- Kawei ka ivmpien kaba lieh naduh ryndang haduh khongdong.
- Ka sari kaba lieh ba don da u hem uba jngum, kaba tap ña ka khlieh bad ña ka jympien jong ki.
- U diengphna ha ka tyrpeng kadiang.
- Ka sandal ha ki kjat.

Ki lah ban don tang lai tylli ki jympien; kawei ban phong, kawei ban sait bad kawei pat ban thad; 2 tylli ki sari da ki jaiñ ba khamtat dor, kawei ban phong bad kawei pat ban sait.

Ka iing jong ki ka dei ban pynpaw shabar ña ka jingduk, wat ha ka rukom pynriam iing ruh.

Ka ñaid ka ieng jong ki ka dei ban long kaba tat. Katba lah ei ki dei ban ñaid da ka kjat.

Ka jingbam jong ki ka long kaba duk, hynrei kaba biang, kaba lah ban pyndap bor ña ki ban pyndep hok ña la ki kamram. "Ka jingleh-pynshitom

jong ki sistar ialade", la ong ka Mother, "ka long ba kin bam ia kaei kaei kaba la buh hakhmat jong ki. Kim dei ban leh sting ia ka bam ka dih, namarba ka bam ka donkam ban pynlong ia ki ki nongtrei ki babha. Ka jingleh-pynshitom jong ki ialade ka long ba kim dei ban jied, hynrei ban bam ia ka bhah ba la mang na ka bynta jong ki bad ban kohnguh."

Ki sister ki ia thiah lang ha kawei ka kamra (dormitory), khlem don kamra kyrpang na ka bynta jongno jongno, namarba ki baduk-batoi bapli ki im kumta.

Wat la ki im duk-imtoi, hynrei ki da tyngkai bha ia ka jingkhuid-jingsuba.

Ka daw jong ka jingduk jong ki ka dei namar ka jingicid. Ka Mother Teresa hi ka la thoh kumne:

"Ki briew jong ngi ki duk namarba ym lah kyrda, hynrei ka jingduk jong ngi ka long ka jingjied jong ngi hi. Ngi kwah ban long kiba duk kum u Krist, uba long uba riewspah hynrei u jied ban shah kha, ban im bad ban trei hapdeng ki baduk."

Ha ka rul jong ki phin shem ia kane : "Ngi bad ki baduk jong ngi ngin shaniah tylli ha ka jingsumar-icid jong u Blei. Ngim sngewlehrain ban leit khrong na kawei ka tyngkong sha kawei pat kum ki briew jong u Krist, uba dalade hi u la im ha ka jingai-isynei jong kiwei bad uba la shakri ia ki bapang bad ki baduk."

Da ka mon sngewbha, kine ki sistar haba la biang pura ki shim halade ia kine ki jingsmai :

Ban im-kohnguh, ban im-duk, ban im-sotti bad ban shakri ia ki baduk tam na ki baduk baroh.

Haba kren shaphang ka jingthmu bakongsan duh jong ka Seng, Ka Mother Teresa ka la ong: "Ka jingthmu bakongsan duh jong ka seng ka long ban pynjah ia ka jingthynrang jong u Jisu ha dieng-phna namar ka jingieid jong u ia ki mynsiem, da kaba trei na ka bynta ka jingpynim bad ka jingpynman hok ki baduk baroh kiba im ha ki slum."

Ka Mother Teresa ka ju ban khia ia kine ki laitylli kiei kiei ha kaba pynkhreh ia ki sistar jong ka:

- Ka jingaiti lut ialade ha u Blei,
- Ka jingshaniah kaba mih na ka jingieid,
- Ka jingkmn bad ka jingphuhsamrkhie bashi-lynter ha kaba shakri ia ki baduk.

"Wat shah ba kaci kaei kan pyndap ia phi da ka jingpangnud ne ka jingsngewsih, ba kan lah ban pynklet noh ia ka jingkmn jong u Krist."

Ki sistar ki pyrshang katlah katiai ban theh lut ialade da ka mynsiem ka jingieid ym ba ki sngew-synei, namarba ka jingsngewsynei ka mih na ka jingsngewkhraw-sngewhch shimet, katba ka jingieid ka kyrsoi na ka jingniew brieve.

"Ngim dei ban shah iano iano ban leit noh na ngi khlem da kham sngewsuk ne sngewkhlañ. Ngim dei ban long kum ka jingphalang jong ka jingbha jong u Blei ha ki baduk. Ngim dei ban don ia ka jingphuh samrkhie ha ki rymmiang shyntur jong ngi. Ka jingphuh samrkhie na ka bynta man la i khun-

lung khynnah iba ngi iarap. Ka jingphuh samrkhie ia kito ki briew baroh kiba pang, ki bashah iehbein kiba wan sha ngi ban ioh ia ka jingpyntngen bad ka dawai. Kan ym myntoi eiei ban ai tang ki jingaisngewbha pyrthei, ngi dei ban tyrwa ia ka dohnud jong ngi ia ki briew baroh."

Ka la ong ruh : "Baroh ngi dei ban iohi ia u Krist ha ki baduk. Katba ka jingtrei bad ki briew kiba ngi trei ki nang long khamblad, katta ruh ka jingngeit, ka jingieid bad ka jingaiti jong ngi ialade ha u Trai lyngba ka jingduk ka dei ban long kaba nang kham khraw bad kaba nang kham khlain."

Da shisha, "Ym dei kaei kaba ngi leh, hynrei ka jingieid kaba ngi tynsat lang ha ki jingleh jong ngi ka long kaba kham kongsan."

Da kanc ka mynsiem kaba dap da ka jingieid, ki sistar ki la saphriang kylleng ka pyrthei. Sha ki 'dewbah Asia, Aphrika, Yurop, Amerika bad Australia ruh kumjuh. Namarba ym dei tang ha India ba don ki baduk khai, kiba shah kyntait bein, kiba sngewmarwei, ki khunswet ki khun rangli, ki nongpang nianglyngkut bad ki briew kiba im ha ki slum kiba shyrkhei.

"Ha Bilat," ka la ong, "ki shitom na ka daw ka jingsngew kynjah marwei. Kim donkam bam kim donkam dih, hynrei ki donkam ia ka jingieid kaba longbriew. Ma ki, ki long u Krist uba thngan na ka bynta jong ngi."

Ha London, ka la iakynduh ia bun ngut ki tymmen kiba shu iathiah ha ki baranda jong ki hotel bad ki iingheh; ka sur kaba kynoi thiah ia ki ka long ka um kaba tuid na ki borshi jong ki resturan

bad ki hotel kiba heh. Harud ka wah Thames kum-juh, ka la lyngngoh ban shem ba da ki spah ngut ki shu thiah ha ka khriat ki da kup tang da ki kot khubor ba la rim ban lait na ka jingdait thah jong ka miet.

Ha Rome (Italy) ruh ki sistar ki la leit ban sah bad ban iarap ia ki babun kiba im ha ki slum kiba kynrei bad kiba shyrkhei. Ha ka jingshisha ki baduk ha Rome kum ha kiwei pat ki bynta jong ka Yurop, ki kham duk shuh shuh ban ia kiba duk kiba don ha Calcutta ne ha kano kano ka bynta jong ka Ri India. Kiba duk ha India ki dang don ia ka jingngeit, katba ki baduk ha Rome kim don jingngeit. Dei kane kaba la kham pyndukha mynsiem shuh shuh ia ki.

"Ha Austrialia pat," Kumba iathuh ka Sistar Agnes, "Ngi trei hapteng ki riwulum-traï kiba dang biej bha, bad hapteng ki samla kiba buaid kyiad bad buaid kynja". Ka la plie ia kawei ka iing na ka bynta kita ki samla ha Melbourne ha u snem 1972.

Ha ka Amerika bashathie, ki bun bha ki jingtrei. Ha sngap ia ka Sistar Dorothy, kaba la ju don teng ha Venezuela ba ka iathuh: "Ngi long kum ki dikon hangtai. Bunsien ngi hap pynbaptis ia ki briew; Bun na ki briew hangtai kim pat ju iohi ia u Lyngdoh ne ia ki sistar, namarba duna phadar bad duna sistar eh ha katei ka ri. Ki briew kim tip eiei shaphang u Jisu. Ngi dei ban hikai ia ki. Ngi rah komunion sha ki bapang. Ki baduk ki im ha ki 'felelas'. Ngi im ngi shong ngi sah hapteng jong ki."

Ki sistar jong ka Mother Teresa ki la leit ruh sha Aphrika, bad ki la aiti ialade da ka jingkylluid

mynsiem ha kaba aibam aidih, ai jaiñ-ai nep ïa ki briew kiba ïa ïap-thngan ha ki bynta bapher jong ka Aphrika, khamtam ha Ethiopia.

Ka Mother Teresa dang mynshem snem ka la leit sha China, ban peit lada ka China ka donkam ne em ïa ka. Ka jingthmu ka long ba lymba jong ki khun jong ka – ki missionary sisters of Charity ka Balang kan ïoh rung biang sha China. Sniew bok ba kane ka jingleit jong ka kam shym long kaba seisoh.

## HA MEGHALAYA

Ha Meghalaya ruh ka syrwet jong ka Mother Teresa kan ym jah ym dam shuh. Ha u Lber 3 tarik 1974, da lade hi ka la wan ban ïalam ïa ki sistar jong ka ban shakri ïa ki baduk na ki baduk tam. Ki la sah ha ka ïing jong ka Miss Lewis Nongrimbah, Laitumkhrah, Shillong. Nangne ki sistar ki la poi ai dawai bad poi jngoh ïa baroh kiba duk ha ka nongbah. Haduh mynta ki leit ai dawai ha kine ki jaka: Nongrimbah (ka ïing shong jong ki), Nongthymmai, Upper Shillong (3 mer), Mawprem, Pomlakrai, Smit, Umpling, Mawlaingut, Mawkasiang.

Nalor ka dawai dashin, ki don ruh ka skul barat ha Mawprem na ka bynta ki khynnah ïew ha ka ktien hindi. Ki la don mynta kumba 75 ngut ki khynnah. Ki la kren bynñiaw ba ka jaka ka rit than bad ba ka khapngiah. Nalor ba ki ai jinghikai ei ïa kat kitei ki khynnah, ki kyrshan bad buh skul ruh ïa 20 ngut ki khynnah ha ki skul bapher hapoh sor. Ha Nongrimbah hi ruh ki ri 6 ngut ki khynnah khunswet kiba la wanphet wir sha ki.

Ha Nongpoh pat ki sistar ki sumar ia ki ba ioh-pang nianglyngkut, ki briew kiba don ha tmier ka jingiap, ki briew kiba anna bad kumta ter ter ... ki la shimti ia kane ka kam ha u snem 1975.

Ka jingim jong kine ki sistar ka la shoh jingmut shibun eh ia ki Khasi, naba hadien khyndiat snem ba ki la rung hapoh kane ka ri ki la ioh ruh ia ki khynnah Khasi sha ka jingiasyllok jong ki. Ha u Nohprah 8 tarik 1983, 2 ngut ki thei samla khasi ka Hilda Suiam bad ka Biona Rynsong ki la shim ia ka jingsmai banyngkong jong ki ha Calcutta, bad ki la pynkylla ia ki kyrteng jong ki. Ia ka Hilda ki khot ka Sistar Camino bad ka Biona pat ka Sistar Josphira. Khlem pep khambun na ki khun Khasi jong ngi kin nang ia bud jynsur ia u Blei ha kaba shakri ia ki baduk na ki baduk tam.

Ka bor, ka jingiaishah bad ka jingkmien jong kine ki sistar ka long da shisha kaba palat liam. Ka tyllong jong kita baroh ka long u Jisu ha ka Yukharist bakhuid.

"Kaei kaba kongsan duh", ka Mother ka ju ong, "Ka long ban hikai ia ki sistar ban don ka jingieid kaba jylliew bad kaba shitrhem ia ka Sakramen bakhuid. Kumta ba kin iakynduh ia u Jisu ha ka Yukharist bad ha ba kin mih shabar na la iing kin shem ia u Jisu ha ki marjan-marpa bad ha kaba shakri ia ki baduk."

Haman ki iing jong ki, don u diengphna bad ka kyntien ba la thoh synrop lang "NGA SLIANG", ban pynkynmaw ia ki ia ka jingthmu ka jingtrei jong ki. Kane ka pynlong ia ki ban duwai :

“Pynlong ia ngi, ko Trai, kiba shonghok ban shakri ia ki para-briew jong ngi lyngba ka pyrthei kaba im bad kaba iap ha ka jingduk bad ka jingthngan. To ai ia ki, ko Trai, lyngba ki kti jong ngi, ia ka jingbam jong ki kaba man la ka sngi bad da ka jing-lehsbun ka jingiasngewthuh jingmut jong ngi ia ka jingieid, ka jingsuk bad ka jingkmn.”

Ki Sistar ki ia duwai lang kum shi iing shi sem la kumno kumno ar kynta shi sngi; nador kata ka Mother ka ju ban jur ia ki sistar ban long borabor ki briew kiba im ha ka jingduwai. Ma ka hi ka la iai kyntu kumne :

“Ngim lah ban rung ha kino kino ki jingtrei marmet khlem da long ki briew kiba im sngi ban duwai. Ngi dei ban sngewthuh borabor ba ngi long kawei bad u Krist, kumba ma U u sngewthuh ia ka jingialong kawei jong U bad u Kpa. Ka jingtrei jong ngi ka long ka kam Apostol bashisha tang lada ngi shah ia u ba un trei kam ha ngi bad lyngba jong ngi da ka bor jong U, da ka jingthrang jong U bad da ka jingieid jong U. Ngi dei ban long ki bakhuid, ym dei namarba ngi shu sngewkwah ban long kiba khuid-kiba hok, hynrei namarba u Krist u dei ban lah ban im pura ha ngi. Ngi dei ban long ka jingieid, ka jingngeit bad ka jingkhuid sotti kaba pura na ka bynta ki baduk kiba ngi shakri. Bad shisien ba ngi la nang ban wad ia u Blei bad ia ka mon jong U, ka jingiakynduh jong ngi bad ki baduk kan long ka lad kaban ialam ia ngi hi shimet bad ia kiwei ruh sha ka jinglong hok kaba palat liam.”



## KI BRODAR MISSIONARIES OF CHARITY

"Ha u snem 1963," Ka Mother Teresa ka dang kynmaw dngong, "U Bishop u la ai jingbit ia nga ban sdang ia ka jingiasyllok ki brodar. Ngi la sngew-donkam ban sumar ia ki khynnah shynrang ha ki skul bad ki rangbah ha ki iing na ka bynta kiba don ha tmier ka jingiap. Bad don ruh kiwei kiei kiei kiba mangi kum ki kynthei ngim lah ban leh na ka bynta ki rangbah ha ki kad-jhad bad kumta ter...."

Ka jingsdang jong ka seng ki brodar ka la long kaba kham eh bad kaba kham tan ban ia ka jong ki sistar.

Ha ka por ka ia kaba bit kaba biang, u Blei u la ai ha uwei u Phadar Jesuit ia ka jingkhok ban shakri ia ki baduk; uta u long u Phadar Ian Travers Ball na Australia. Haba kren shaphang jong u ka Mother Teresa da ka jingsngewieid ka la ong: "U long u briew uba riewblei, uba riewblei da shisha. U la long u Jesuit uba tbit bha ha ka liang ka met, ka mynsiem bad ka jingmut jingpyrkhat. Baroh arngut ngi la don ia ka juh ka jingmut jingpyrkhat - kata ka long kaba phylla; hynrei ngi ia pher bak lybak. Ma u, u khambun ia ki sap trei kam ban ia nga. U la long shisha uba tbit bha ha bun ki liang. U, um shym dei u brodar uba nyngkong. Ki brodar ki la sdang ha u snem 1963, katba u Brodar Andrew (Phadar Travers Ball) u la long u riewdkhot tang ha u snem 1965."

Haba kylli ia u Bro. Andrew : "Hato ka Mother Teresa ka la don kti eiei ha ka jingraikut jong phi ban ia snoh kti lang bad ki brodar ? ne ka la ju ai

jingmut teng ia phi ban iasyllok lang bad ka ha kane ka jingtrei ?”

U Brodar Andrew u la jubab :

“Em, ka jingraikut ka dei lut ka jong nga. Ka la shu jia, bad ka khlem da shim por eh. Nga dang pyndep ia ka jingpynkhreh ialade ha Sitagarha hajan Hazaribagh. Nga la sngewieid borabor ia ki baduk bad nga la thrang ruh ban ioh trei na ka bynta jong ki. Ha kane ka por jong ka jingpynkhreh ia ka tertianship, la phah ia nga ban leit trei lang bad ki brodar kiba la sah ha Shishu Bhawan (Ka iign na ka bynta ki khynnah ha Calcutta) na ka bynta khyn-diat por. Haba nga la wan phai sha Sitagarha, nga la ia kren bad u nonghikai jong nga u Phadar Schillebeeckx; nga la ong ia u ba nga kwah ban leit iasyllok lang bad kine ki brodar ka Mother Teresa. U la mynjur khlem da thlia. U Phadar Provincial jong ki Jesuit ruh na Calcutta u la shah mon sngew-bha ia nga. Nga la pan jingbit na Rome. Hadien khyndiat taiew nga la ioh ia ka Jubab bad nga la leit bak bak sha Calcutta. Ki Jesuit baroh ki la pyn-shlur bad iarap bha ia nga.”

Mynta ki khot ia u, u Brodar Andrew; u la long u Rangbah duh kane ka seng riewniam jong ki brodar da bun bun snem.

Ki brodar ki kham duna ban ia ki sistar, hynrei ki trei ia ka juh ka kam da ka juh ka mynsiem : Ka jingaiti lut ialade na ka bynta ki baduk da ka myn-siem kaba shlei borabor da ka jingkmnen. Ki rung sha ki jaka ba ki sistar kim lah ban rung. Ki im ha ki slum bad ki trei na ka bynta ki buaid kani – ki buaid kynja bad ki buaid kyiad.

Ki brodar ki trei ha Shishu Bhawan, ha Nirmal Hriday bad ha kiwei de ki jaka ka Ri India. Shabar ka Ri pat ki trei ha kine ki jaka :

Ha Los Angeles (America) ki don 25 ngut ki brodar kiba trei na ka bynta ki baduk. Ki leit jngoh ia ki baduk – kiba duna, ki pyniaid ia ki marbam sha ki baduk na ki iew ki hat, ki lum ia ki jingbam ba la shu bret na ki iew ban pyndap ia ki bathngan. Ha Cambria (America) ki ai jaka rieh tngen ia palat 20 ngut ki briew ki bym don tnum ban rieh. Ki brodar ki trei ruh hapdeng ki bapang ñianglyngkut, ki nongdih kyiad bad ki nongdih kynja.

Shabar ka Ri, kine ki brodar ki trei ha America, Hongkong, Taiwan, Korea, Guatemala, El Salvador, Japan bad Macao.

Da ka mynsiem kaba puh samrkhie, da ka dohnud kaba sngewnguh, da ki khmat kiba iohi bad ki shkor kiba iohsngew ia ka sur jingud jong u Jisu ki ong: “Ngi sngewnguh shibun ban don hangne ban aibam ia u Jisu, Uba thngan bad uba sliang; ban pynkup-pynsem bad ban ai iing ia u Jisu uba khriat bad u bym don iing; ban kdup bad ban ieid ia u Jisu uba shah pynsniew dur bad uba sngew marwei.”

Ki baduk na ka bynta jong ki, kim long ki shiah hynrei ka pansngiat ksiar kumba ong u Brodar Andrew :

“Ki jingtngen babun bad ba jyllei ki kyrsoi na kanc ka jingtnei hapdeng ki baduk. Ka don ka jinghun kaba khraw kaba mih na ka jingiohi ba la pynsuk pynsaiñ bad pynduna ia ka pang ka shitom. Ki bapang ki ioh biang ia ka jingkoit jingkhiah krat, ki iing ki sem kiba shem jingtnei jingktah biang; ki

khunswet ba shu shah ieh beifn kiba ioh jaka rieh bad kiba jubab ia ka jingieid kum ki brieve; ki nongdih buaid bad ki kyrni kynja kiba lah ban pynkoit noh ialade na ki jingpynshoi kiba bun."

## KI MISSIONARY OF CHARITY CONTEMPLATIVE (Ki Missionary of Charity, ba im sngi ha ki Jingduwai)

Ha u 'Nailar 1974, ka Mother Teresa ka la kyrpad ia u Phadar Gorce uba na Ri Phrans ban pyniasoh ia ka jingtrei jong ki sistar bad ki iing duwai – iing puson bakynrei ha ri Phrans. Ka Mother ka da kwah eh ba kito kiba trei marmet bad ki baduk kin nang iohbor ioh sor na kito ki riewniam kiba shu im sngi ha ki iing puson ban duwai.

U Phadar Goree da ka jingkmien u la leh shitom ban pyniasoh ia ka kam jong ki Sistar bad bun ki kynhun riewniam ha Belgium, Canada, France, Germany, Italy, Luxumberg bad England.

Kine ki ar kynhun ki ia phah khubor ban ia pynshlur mar kylliang, ki Riewniam halor lum lang bad u Krist ki duwai sha u Kpa dang step phyrngab, mynsngi, janmiet bad mynmiet. Katba ki Sistar ka Mother Teresa pat ki trei ki theh syep theh syar ban wallam biang ia ka dur u Blei ha ki khmat ba la lip rong da ka jingia-isih, ka jingiashun, ka jingbymkheifn-kor bad ka jingiadih-snam.

Ha u snem 1976, ha ka sngi burom ka Dohnud Bakhuid Tam u Jisu, ka Mother ka la seng sa kawei ka seng riewniam ki kynthei ha New York – Ki ba long ki MISSIONARY OF CHARITY CONTEM-

**PLATIVES.** Ka kamram jong kine ki sistar ka long ban im ia ka Ktien jong u Blei lyngba ka jingmane Sakramen, ka jingpuson bad ban pynbna ia ka Ktien u Blei ha ki baduk tam na ki baduk da ka jingtrei ba kynja mynsiem jong ki. Da kumne ka Ktien kaba la mandoh – kan ia shongsah ha ka dohnud ki briew.

Ha Rome pat ka la seng sa ia ka jingiasyllok ki brodar **MISSIONARY OF CHARITY CONTEMPLATIVES** ban trei na ka bynta ki baduk da kaba duwai bad puson.

Ka Mother ka la angnud ba kine kin long ka tlong kaba nang aibor-ai mynsiem ia kito kiba trei marmet bad ki baduk, bad ba kin ia neh haduh kaba kut ban shakri ia u Krist na kane ka phang.

**Ka jingleid ka tel,  
Tang ka jingleid ka tel,  
Ka jingiashun-ïapen ka pynjutor.**

**– JOHN PAUL II**

## **5.**

---

### **KI NONGIATREI LANG**

Nalor ki sistar, ki brodar bad ki riewniam-puson, ka Mother Teresa ka la seng ruh sa kawei ka shnat na ka bynta ki paidbah satlak ka pyrthei ban ïasynrop lang bad ka da ki jingleh isynei, ki jingduwai, ka jinglen ïalade bad kumta ter ter... ïa kine ki ba ïa noh synrop bad ka ha kane ka kam baradbah la khot ki Nongiatrei lang. Don ar kynhun kum kine ki Nongiatrei lang kumba yn kdew harum :

### **KA SENG KI NONGIATREI LANG JONG KI BAPANG-KIBA SHITOM**

Ha u snem 1949, ha Patna, ka Mother Teresa ka la ïakynduh ïa kawei ka samla briew kaba kyrteng ka Jacqueline De Decker kaba dang shah sumar ha ka hospital. Shen kine arngut ki la ïa dei paralok bha. Haba ym lah shuh ban sumar ïa ka ha Patna, ka Jacqueline ka la leit noh sha Belgium. Ha Belgium ruh ki doktor ki khlem lah ban leh ei ei shuh ban pynkoit ïa ka.

Ka Mother haba ka la iohsngew ia kane ka khubor basngewsih, ka la kyntu ieid ia ka Jacqueline ban sdang noh sa kawei ka shnat ki Missionary of Charity ban iarap, ban aibor-ai mynsiem ia kito kiba ia trei marmet bad ki kam ki jong u Krist khnang ba kin nang lah ban thom ia ki jingeh baroh kiba ki iakynduh bad ba kin long borabor kiba jop. Naduh kata ka sngi ka Jacqueline ka la sdang ban tyrwa ia ki jingduwai bad ki jingshahshitom jong ka na ka bynta ka jingjop ki Mishonari kiba dang trei ha ka sngi, u slap, ka lyer bad u phria ban wallam ia ka khubor babha jong u Krist.

Ka Mother Teresa ka la thoh kumne : Sha ka Jacqueline :

"Maphi bad kiwei pat kiba iasynrop lang bad phi kin ioh bynta ha ki jingduwai, ki jingtrei bad ki jingleh jong ngi baroh. Da ki jingshahshitom jong phi, phi lah ban ia shim bynta ha kiei kiei kiba ngi lah ban leh. Ka Jingthmu jong ka seng jong ngi ka long ban pynjah ia ka jingthynrang jong u Jisu ia ka jingieid jong ki briew. Ngi leh ia kane da kaba trei na ka bynta ka jingbha jong ki briew ha ki slum. Hynrei, mano ban lah leh kham bha ban ia phi bad kiwei pat kiba shitom bad ki bapang ? Kaei kaba phi lah ban leh na ka jingthiah pang jong phi ka kham dondor ban ia kaei kaba nga lah ban leh hapteng ki baduk kiba bun ngai-ly-ngai. Hynrei shi mynsiem, maphi bad manga, ngi lah ban leh ia kiei kiei baroh ha Uta uba shanbor ia ngi."

Kumta ka Jacqueline ka la long kaba nyngkong duh bad kaba ha khlieh duh jong "Ka seng ki nong-iatrei lang ki bapang bad ki bashitom."

Kane ka seng ka la nang iar mynta sha Bilat, France, America, Spain, Canada, Germany, Belgium, Poland, Hungary, bad Italy. Wat la ki pang ki shitom, la kim lah ban khie na la ki jingthiah, hynrei ki kmen naba, kumba ong ka Mother Teresa, "Ki lah ban long ki Mishonari ha Belgium da ka met, bad da ka mynsiem ha India." Ka Mother ka la kmen shibun haba iöhi ia ka jingroi jong kane ka seng. Ha kawei pat ka shithi sha ka Jacqueline ka la ong :

"Maphi baroh phi long ka daw ka jingkmeng jong nga. Haba ka jingtrei ka da ban khia ch, nga ju pyrkhat bunsien shaphang jong phi iwei pa iwei. Da kaba pyrkhat ia ki jingshahshitom jong phi, nga pan na u Blei ba un kyrkhu ia ki jingtrei jong ngi. Nga ju sngew ba u Blei u sngap ia nga hangta hangta hi."

## KI NONGIATREI LANG (CO-WORKERS)

"Ha ka jingtrei jong ngi," la ong ka Mother, "Ngi don bun ngut ki briew kiba ngi khot ki Nongiatrei lang. Nga kwah ba kin ai ia la ki kti ban shakri bad ki dohnud jong ki ba kin ieid ia ki briew. Namar khlem da iadei bad khlem da iöhi hi ka long kaba eh ban tip shaphang ki baduk. Dei namarkata ka daw ba hangne ha Calcutta leilei ngi don bun ngut ki bym long kristan bad kiba long kristan kiba ia trei lang ha ki iing jong kiba la jan dkut mynsiem bad ha kiwei de ki jaka. Ngi don ki kynhun kiba pynkhreh ia ki jainisop-jaini spain bad ia ki dawai ki dashin na ka bynta kito ki bapang nianglyngkut."



"Kum ka nuksa, uwei u Nong Australia u la wan shisien sha nga bad u la ong ba u kwah ban ai ha nga ia ka jingaisngewbha kaba heh bha. Hadien ba u la sei ia Ka Song jingai sngewbha jong u, u la ong, 'Kato ka dei kaei kaei kaba shabar na nga, hynrei nga kwah ban ai ruh khyndiat kaba dei na-poh jong nga!' Mynta u wan man ka teng sha ka Nirmal Hriday, u pynkhi ñiuhmoh bad u pyntngen ia kiba la jan iap. Ha ka jingshisha, u la lah ban tyngkai lut ia ka por bad ia ka pisa na ka bynta ialade shimet, hynrei u la kwah ban ai eiei na lade bad u la ai ruh khlem babe."

Ka Ann Blaikie, ka shongknor jong kane ka seng, ka la batai kumne shaphang ka jingiaikynduh nyngkong jong ka bad ka Mother Teresa bad shaphang ka jingiaid shaphrang jong ka seng:

'Ka bor trei kam jong ka Seng ki Nongiatrei lang ka la sdang ha ka rukom kaba phylla. Nga la leit ban iakynduh ia iwei i paralok ha u snem 1954 ban kylli tohkit, la i tip lad kumno ba ngan lah ban iakynduh ia ka Mother Teresa? Namarba, nga la sngewthuh ba nga lah na ka liang ki paralok phareng ban ialum ialang khyndiat tylli ki jingialeh-kai na ka bynta ka sngi burom Kristmas, kaba ka Mother ka ju pynlong na ka bynta ki khynnah khunswet jong ka.

'Khlem da shim por slem, ngi la iakynduh bad ngi la iathuh ruh ia ka Mother ia ka jingrai jong ngi. Ka Mother ka la kmen tynggeh, ka la kylli ia ngi la ngi lah ne em ban lum pisa ban thied jaiñi, thied juti ha kata ka Kristmas na ka bynta ki khunlung khynnah kiba ka ri ka sumar. Ia kane ngi la iamynjur

bad ngi la leh. Hadien ka Kristmas, ka Mother ka la wan ban iakynduh ia ngi bad ka la kylli ia ngi la ngi lah ban lum pisa sa shisien na ka bynta ka sngi burom ki khynnah Musulman. Hadien kane, ngi la shu ia sngewthuh hi, ba kan sa wan biang ban kyntu ia ngi ban lum pisa sa na ka bynta ka sngi burom ki khynnah Hindu. Kumta ngi la hap ha ka shang-khawiah jong ka.

"Suki-pa-suki ka kynthun ka la nang iar bad ka la nang phriang kylleng, haduh ba u Kpa Bakhuid u Pope Paulus VI, ha u Lber 26 tarik 1969, u la kyrkhu ia ki rul jong ka seng bad u la ai jingbit ba ngin long ka shnat jong ka Seng Missionary of Charity kum ka 'INTERNATIONAL ASSOCIATION OF CO-WORKERS of MOTHER TERESA!'"

Ban long ki riewdkhot jong kane ka seng, ym donkam ban siew bai rung ne bai synniang, ne ban ioh ia ka takma long riewdkhot. Ban long riewdkhot ka long nvngkong nyngshap ka jingmon la jong shimet. Ka Mother ka khot ia kane: "Ka Lynti ha ka jingim." Ban long riewdkhot donkam ban sngewthuh ia kine harum:

1. Kane ka seng ka kynthup ia ki rangbah, ki kynthei, ki samla bad ki khynnah kiba na kano kano ka jait niam satlak ka pyrthei kiba angnud ban icid ia u Blei ha la ki marjan-marpa da kaba shakri kylluid mynsiem ia ki baduk tam na ki baduk baroh, la ki long na kano kano ka kynthun longbriew, ka jingngeit ne ka niam; bad kiba kwah ban pyniasnoh lang ia ka jingim jong ki bad ka jingtrei jong ka Mother Teresa bad ki

**Missionary of Charity da kaba duwai bad kaba len ialade.**

2. Ka Jingthmu kaba kongsan duh jong kane ka Seng ka long ban iarap ia ki riewdkhot jong ka ban iohi ia u Blei ha ki briedw kiba duk, bad ban ieid ia U kham palat shuh shuh lyngba ki kam isynei bad ka jingshakri ia ki baduk. Ban tip ia ki baduk, namarba ka jingtip ka ialam sha ka jingieid, bad ka jingieid ka dem shakri. – Ban pynlong ia ki Nongiatrei lang ban ia shim bynta ha ki kam ka Mother Teresa, da kaba len ialade bad da kaba leh kunai. – Ban pynpaw ia ka jingieid bad ka jingsngewsynei nyngkong nyngshap ia kito ki dkhot ka iing la jong, nangta sa sha ki paramarjan.
3. Ki Baduk tam na ki baduk – ki dei kito kiba thngan, kiba sliang, kiba lyngkhuit, ki bym don iing, ki babiej baanna, ki koidi, ki dkoh, ki buaid kynja, kiba iap da kaba shah ieh bein, kiba sngewsih, ki bym don baieid ia ki, kiba shah ban bein bad kito baroh ki ba duh jingkyrmen.
4. Ki Nongiatrei lang ki kheinkor ia ka kyrdan bad ka jingkordor jong ka longbriedw-manbriedw.
5. U Krist, uba riewspah, u kylla duk namarba u ieid ia ngi, bad ngi ngin ia pyrshang ban pynim ia ka jingieid da ki kam. Ngi dei ban pyllait ialade na kiei kiei kiba lah ban pynthame ne pynlip ia ka jingieid jong ngi iwei ia iwei pat.
6. Ha ka juh ka por bad da ka juh ka mynsiem, ki Nongiatrei lang ki pynbiang na ka bynta ki

Mishonari ia kiei kiei kiba ki lah ban ai, naduh ka por, ki mar ki mata haduh ki jingiarap mynsiem kiba ki donbor bad don lad ban ai. Ki tyrwa ia la ki jong ki talen ha kaba shakri ia ki baduk.

7. Kumba ki Sistar bad ki Brodar Missionary of Charity ki aiti lut ialade ban shakri ia ki baduk, kumta ruh ki Nongiatrei lang ki aiti hun ialade da ka jingieid bad ka jingkmen.
8. Ka Seng ki Nongiatrei lang jong ka Mother Teresa, kam dei ka seng kynshew pisa. Ka Mother Teresa ka pdiang ia ki jingai sngewbha kylluid mynsiem, ba la phah da no da no sha ka lyngba ka seng.
9. Ki Nongiatrei lang ki duwai wat ha ki jingtrei jong ki da kaba leh ia kiei kiei baroh na ka bynta u Jisu. Ki ialum lang la kumno shisien shibnai ban ia duwai ban ia puson lang shaphang ka jingieid u Blei.
10. Man ka sngi, ki Nongiatrei lang ki duwai :  
To pynlong ia ngi ko Trai,  
Kiba bit ban shakri ia ki parabriew jong ngi,  
Kiba im bad kiba iap ha ka jingduk  
satlak ka pyrthei.  
Ai ia ki,  
Lyngba ki kti jong ngi,  
Ka jingbam jong ki kaba man ka sngi;  
Bad da ka jingsngewthuh jingmut jong ngi  
  
To ai ha ki ia ka Jingsuk, ka Jingieid bad ka Jingkmen. Bud sa ka jingduwai jong ki Missionary of Charity (Sla 32).

**"Ka Mother Teresa,  
ka la ktah ia ki dohnud jong ngi :  
Haba iohsngew shaphang ki jingtrei jong ka  
hapdeng ki baduk bad ki bapang,  
Ngi shu sngewrit !"**

**- INDIRA GANDHI.**

## **6.**

---

### **KA NAM BAD KA BUROM NA KA PYRTHEI**

"Nga dei ban leit sha ka Skul bah Santiniketan ban ioh ia ka dikri," Ka la ong, "Ngam tip balei ki skul bah bad ki skul rit ki kwah pyndeng nam ia nga. Ngam ju sngewnang rai ba ngan pdiang ne ngan kyntait ia ki : Kine baroh kim long eiei na ka bynta jong nga, hynrei ki plie lad plie lynti ba ngan ioh kren shaphang u Krist ha ki briew kiba lym kumta kin ym ioh lad ban iohsngew shaphang jong U."

Dei da kane ka jingthmu ba ka la pdiang ia ki dikri, ki prais bad ki khusnam khnang ba u Krist un paw ha ka pyrtnei ha ka dur ka dar jong ki baduk, bad da kaba leh kumta vn kyntiew ia ka kyrdan ka long-briew man-briew jong ki.

Ka Mother Teresa hi shimet kam ju thrang ia kino kino ki jingpynbna pyrtnei shaphang ialade ne ki jingkam jingleh jong ka. Ka ju iai ong bunsien ia kito kiba mut ban thoh kot shaphang jong ka, ba kin ym thoh shaphang jong ka hynrei shaphang ka jing-

trei na ka bynta ki baduk jong ka kiba donkam ban  
ïoh pat sa shisien ïa ka jingithuh da ka pyrthei.

Ka Mother Teresa kam ju pdiang da leilei ruh ïa  
kino kino ki Grant na ka sorkar, namarba kine ki teh  
ki khum ïa ka ha kaba pynbiang ïa ka kheiñ ka diah  
bad ka thoh ka tar. Kam ju pdiang tulop ne pisa kaba  
lah ban teh bor ïa ka. Shisien ka la phah noh  
\$ 500,000 (Kumba 45,00,000 tyngka), namarba u nong-  
phah u la ai ïa kane ka pisa kum ka baiseng na ka  
bynta ka seng jong ka. Ka la ong : "Ki baduk kim  
don boina, kim don ka seng ka dang, kumjuh ngi ruh  
ngim treh ban don. U Blei u pyndap." Da ka jingbym  
banse, bad dei namar ba ka ïohi ïa ka kti ïada bad ka  
rukum pyndap jong u Blei, ba ka pdiang mon  
sngewbha ïa kino kino ki jingtyrwa, ym dei na ka  
bynta jong ka hynrei na ka bynta ka jingtrei hapdeng  
ki baduk jong ka.

Dei ha u snem 1962 ba kane ka Riewkynthei kaba  
riam da i sari lieh, ka la kem nyngkong ïa ka mat-  
ïong jong ka pyrthei. Ha une u snem, u President ka  
Indian Federation ha ka jingiadon lang u myntri  
rangbah u Pandit Nehru, u la ai ha ka ïa ka khusnam  
PADMA SHRI, kawei na ki khusnam baheh duh jong  
ka Ri India.

Ha u snem uba bud 1963, ka Conference of Asiatic  
States, ka la pyndeng ha ka Mother Teresa ïa ka  
MAGSAYSAY PRIZE, da kaba pynbna pyrthei ba ka  
long ka briew kaba shonghok duh hapoh Asia !

Ka jingaisngewbha jong u Pope Paulus VI ïa ka  
Mother Teresa ha u Nohprah 1964, hadien ka Inter-  
national Iucharistic Congress hapoh Bombay da ka  
kali lieh, 'White Lincoln Convertible,' ka la pynsmiej

bad pynpeitmat ia bunbah ki briew ha India bad shabar ka Ri ruh. U Pope u la ai sngewbha ia kane ka kali "Na ka bynta ka kam jingieid kaba salonsar" – shuwa ba un kiew ha ka liengsuiñ kaban rah noh ia u sha Batikan. Katba u Pope u nang ai khublei ia ka ha Bombay, ma ka pat ka nang don ha kata ka por hajan u Onil uba ka dang shu dep tam na kawei ka nala jong ka Calcutta. Ia kane ka kali la shu khalai nusib bad ia ka pisa baroh la pyndonkam na ka bynta ki baduk ka Ri India.

Ha u snem 1972, ka la ioh ruh ar tylli ki khusnam na ka Ri America kiba long ka GOOD SAMARITAN PRIZE bad ka PRIZE OF KENNEDY FOUNDATION. La ai ha ka ia kine ki prais kum ka jingñiewkor ia 'ka jingieid bad ka jingaiti mon jong ka ialade ban shakri ia kito kiba anna ha ka met ka phad, ha ki sap longbriew bad ia ki paid byllien baroh kiba shu shah kyntait beiñ ha ka pyrthei baroh kawei.'

Ka Mother Teresa ka la long ruh ka briew kaba nvngkong ban ioh ia ka JOHN XXIII PEACE PRIZE. Ki Nongbishar ki la jied ia ka namar 'Ka jinglen ialade bakynrei jong ka bad ka jingtyrwa sbun jong ka ia la ka jingim ha kaba iarap ha India bad ha kiwei pat ki ri jong ka pyrthei ia kito kiba ngat ha ka thngan ka sliang, ka jingjynjar, ka jingpang, ka jingshah kyntait iing, ka jingshah iehbeiñ. Kane ka long kum ka jingithuh ka pyrthei ia ka jingtrei shitom jong ka ban pynkiew irat ia ka jaitbynriew, ban bujli ia ka jingsngewsih da ka jingieid kaba longblei. La ai ia kane ka prais ha ka Nongbah Batikan ha ka jingiadon lang bun ngut ki briew bapawkhmat ka Balang. U Pope Paul VI u la kren sngewieid shaphang

jong ka, kumne : 'Ka Riewniam kaba sngewrit bad kaba jarjar, hynrei kaba ym lah ban buhrieh ialade ... ka long ma ka ka nuksa bad ka shap jong ka jingshem pat ia ka jingtyrwa mon ialade jong u khun bynriew ha kaba ka shongneh ka jingsuk ha pyrthei.' U la pynkut da kine ki kyntien bashoh jingmut, "Ka long ka jingshem (Discovery) kaba dang ia dei samoi bha ba u briew u long u hynmen u para jong ngi."

Ha u snem 1972, ka la ioh sa ia ka PANDIT NEHRU AWARD FOR INTERNATIONAL UNDERSTANDING, kum ka jingñiew burom 'ia ka jing-shakri sbun jong ka, khlem ñiew shiliang khmat iano iano ruh na ka daw ka jinglong kynhun bynriew, ka jingngeit ne ka niam, bad ba ka la trei jynsur mynsiem khlem da dawa ia kino kino ki nam ki burom ne ki jingiaroh na ka pyrthei'.

Ka la ioh ia ka TEMPLETON PRIZE ha London bad ia ka ST. LOUISE DE MASSILAC PRIZE ha Los Angeles ha u snem 1973. Ha u juh u snem ka shnong Milan ha Italy ka la ohdur ia ka ha ki pisa ksiar ka ri da kaba bynrap ia kine ki ktien 'Ka Kmie jong ka Asia.'

Ia ka Mother Teresa la jied na ka bynta ka Templeton Prize na ki 2000 ngut ki riewpawkhmat ka pyrthei da shiphew ngut ki nongbishar kiba dei na ki niam bapher. 2 ngut ki dei ki Anglican (Shor), 2 ngut ki Presbyterian, Uwei u Methodist, Uwei u Ju, Uwei u Muslim, uwei u Buddhist, uwei u Hindu bad uwei u Katholik.

Ha kaba pdiang ia kane ka Khusnam, ka Mother Teresa ka la ong :



“Ha kaba ai ia kane ka khusnam ha nga, la ai ia ka, ha ka jingshisha, ha kito ki briew baroh kiba ia shim bynta lang bad nga satlak ka pyrtnei ban ia noh kti lang ha ka kam ban ieid bad ban pynphriang ia ka jingieid jong u Blei hapdeng ki briew.”

“Ha ka jingshisha ngi ia ktah ia ka met jong U. Dei ia u Krist uba thngan ba ngi ai bam; dei ia u Krist uba lyngkhuit ba ngi pynkup; dei ia u Krist uba phetwir ba ngi ai jaka shong-jaka sah; bad kam dei tang ka jingthrang ia ka bam; ka jinglyngkhuit ha ka jaiñ ka nep; bad kiba khlem ki iing ba la shna da u mawit; hynrei u Krist mynta ka sngi u don ha ki bathngan, ha ki baduk, bad wat ha ki ba riewspah ruh.”

“Hangne ha England (Bilat) bad ha kiwei ki jaka ruh kum ha Calcutta, ngi shem bun ngut ki briew kiba sngewmarwei, kiba sngewtmang. Ngì don shano keiñ haba kumta? Hato ngi da tip shai ba don kum kine ki briew kiba im teng teng marsyndah iing bad ngi? U lah ban dei uba matlah u ban da sngewkmen haduh katta katta lada don ba pule ha u ia ki khubor. Ne u briew uba riewspah uba shu shah kyntait beiñ, u bym ju don ba jngoh ia u. Kum une u briew uba riewspah u don bun kiei kiei hynrei u shu ngop ei naba ym don ba ktah ia u. U donkam ia ka jingktah jongno jongno – U ap kmang ia ka sur ieid kaba mih na u briew.”

Nalor kine ka Mother Teresa ka la ioh ruh ia ka ALBERT S. AWARD jong ka America ha u snem 1975. Ka United nations ruh ka la buh ia ka dur jong ka ha ki pisa kiba ka la pynmih kyrpang ban iarap ia ki baduk sawdong ka pyrtnei.

Ha u snem 1979 pat, ka la ioh ia ka BALZAN AWARD na u President ka Italian Republic, u Sandro Pertini; bad ia ka NOBEL PEACE PRIZE ha u snem 1979. Haba pdiang ia kane ka khusnam, ka la bthah ia ki nongpyniaid ban ym pynlong ia ka jingkhawai burom kumba ju long, hynrei ban ai ia kane ka pisa-khawai-burom ban pyndap ia kiba thngan kiba shitom sawdong ka pyrthei.

Nalor kine ka Mother Teresa ka la ioh ruh ia bun kiwei pat ki khusnam, ki prais bad ki dikri na ki ri bapher. Ka la ioh ia ka Doctor of Humane Letters Degree na Washington, America (1971); Ka Mater et Magistra Award ha America (1974); Ka Honorary Doctorate of laws, na ka St. Francis Xavier's University, Canada (1975); Honorary Doctorate na ka Santiniketan University, India (1976); Doctor of Divinity na Cambridge University, England (1977) bad kiwei kiwei de.

Ha u Iaiong shi tarik, 1980, hadien ba ka la ioh ia ka Nobel Peace Prize, ka Mother Teresa ka la pynbna paidbah ba kan ym leit shuh shano shano ban shim ia kino kino ki Khusnam, ki prais ne ki dikri, namar, kumba ka ong: "Ka khmat ka pyrthei kaba la shat ha nga naduh ba nga la ioh ia ki khusnam bapher, ka la pynthut ia ka jingtrei jong nga haba shakri ia ki baduk."

Mynta ngi iohsngew bun ki riewpaw khmat pyrthei kiba wan jngoh ia ka Ri India, ki da leit dalade hi sha Calcutta ban tyrwa ia ki khusnam ba ki wan-rah na ki ri jong ki na ka bynta ka Mother, kum kaba la jia haba kut u snem 1983 haba ka syiem jong ka Bilat, Ka Elizabeth ka la poi hi sha Calcutta

ban pyndeng nam ia ka, bad u Dr. Fred Sinowatz, u ba long u Myntri rangbah jong ka Austria uba la wan kit ki nam bad ki dawai dashin na ka bynta jong ka ha u snem 1984.

Uwei u briew uba la iarap shisha ban kyntiew nam ia ka Mother Teresa hakhmat ka pyrthei dei u Malcolm Muggeridge, uba la ialam ia ka kynhun shondur batbit jong u na England (B.B.C.) ban ring phlim shaphang ka jingtrei jingktah jong ka. U la ai kyrteng ia kane ka phlim SOMETHING BEAUTIFUL FOR GOD. U la thoh ruh kawei ka kot shaphang jong ka da kane ka juh hi ka kyrteng. Dei lyngba jong u ba ka mynsiem ieid para-briew ka la kyndit bynriew ha ki thain sepngi ka ri Yurop. Mynta lyngba jong u ka Mother Teresa ka ioh ki paralok, ki nongkyrshan satlak ka pyrthei. U Malcolm, uba ju long u Kristan tang ka nam, mynta u la shem pat ia u Krist lyngba jong ka. Kumjuh ruh u Dominique Lepierr, u nong thoh ia ki kot : ' IS PARIS BURNING ? ' ' FREEDOM AT MIDNIGHT ' bad ' THE 5TH HORSEMEN ' u la ioh biang ia la ka jingngeit lyngba jong ka.

"Phi tip !" ka ju ong, "Kine ki khusnam kim dei na ka bynta jong nga, ki dei na ka bynta ki briew jong nga. Dei na kata ka daw ba kim ktah ia nga, namarba nga tip ba kim dei na ka bynta jong nga, hynrei na ka bynta ki baduk. Suki jai ka pyrthei ka sdang ban ithuh bad ban peiphang, ban ieid bad ban pdiang ia ki. Ka jingdon jong ki jingthoh kiba bun haduh katne katne ki pynpaw ba ki briew ki la sdang ban khih bad ban sngewthuh."

Ha u Jylliew 20 tarik, 1985, ka Mother Teresa ka la pdiang ia ka MEDAL OF FREEDOM na u President Ronald Reagan ka America. Ka la pdiang ia kata ka Medal-nam kum ka dak ka shin jong ka jingburom ka pyrthei ia u Blei bad ia ki baduk. U President Reagan u la nam ieid ia ka "Ka riewkhuid ki nala." Ha ka jingkren jong u, u President u la ong, ba ha ka jingshisha kane ka khusnam ka dei tang na ka bynta ki Nong Amerika kiba la leh eiei na ka bynta la ka jong ka Ri. Hynrei ha ka Mother Teresa ym don pud don sam. "Ma ka ka long da shisha ka nong-shong-shnong bashisha jong ka pyrthei."

Haba ka Mother Teresa ka la ieng ban kren, ka la sdang da kaba ong : "Nga long ka bym shong hok ban ioh ia kane ka khusnam, hynrei nga pdiang ia ka na ka bynta ka burom bakhraw jong u Blei bad ha ka kyrteng jong ki milion ngut ki briew kiba duk sawdong ka pyrthei."

U President Reagan u la kren biria ba ka Mother Teresa ka lah ban long ka briew kaba nyngkong ka ban sa die ia kata ka medal ban ioh pisa na ka bynta ki baduk.

**Ka Jingim jong ka Mother Teresa  
ka long ka Jingduwai kaba im.  
Ka sngew ba ka jingkynjah, ka  
jingdon marwei bad u Blei ka  
long kaba donkam eh – kum ka  
jingtrei jong ka.**

**– DESMOND DOIG.**

## **7.**

---

### **KA BRIEW JONG U BLEI**

“Ngi long nyngkong nyngshap ki riewniam; ngim dei ki nongtrei pynbha ia ka imlang sahang, ngim dei ki nonghikai, ne ki doktor, ne ki nos. Ngi dei ki sistar riewniam. Ngi shakri ia u Jisu ha ki baduk. Ngi sumar ia U ngi aibam ia U, ngi pynkup ia U, ngi leit jngoh ia U, ngi pyntngen ia U ha ki baduk, kiba shah ibeiñ, ki bapang, ki khunswet bad kiba iap ibeiñ. Hynrei kaei kaba ngi leh, ki jingduwai, ki jingtrei bad ki jingshahshitom jong ngi baroh ki long na ka bynta u Jisu. Ka jingim jong ngi kam don jingmut eiei – kane ka dei ka mat kaba bun ki briew kim sngewthuh – Nga shakri ia u Jisu ar-phew-saw kynta shisngi; kaei kaba nga leh ka long na ka bynta jong U bad ma U u nang aibor ia nga. Nga iei ia U ha ki baduk, bad ia ki baduk ha U – Hynrei u Trai u wan nyngkong.”

“Haba don briew kiba wan jngoh kai ia ka iing jong ngi.” Ka la nangbteng, “Nga ialam ia ki sha

Yingmane ban duwai shipor." Nga ong ia ki, 'Ia ngin ia ai khublei nyngkong ia u Kynrad ka iing ka sem' – U Jisu u don hangne, dei na ka bynta jong U ba ngi trei bad ha U ngi aiti lut ia la ka jingim. Ma U, u aibor ia ngi ban jam shaphrang ha kane ka jingim da ka jingsuk mynsiem. Khlem ma U ngin ym lah ban leh ia kaei kaba ngi leh."

Da shisha, ka Mother ka long ka briew jong u Blei kaba da riwblei eh. Ka la pynsuhthied ia la ka jingtrei ha ka nongrim jong ka jingngeit, ka jingieid ka jingkyrmen bad ka jingtrei shitom. Wat la ka bunkam, ha kaba leit tam ia ki baduk, ba jan dkut mynsiem, wat la ka dei ban ai bam ia ki hajar ngut, kam ju klet ba ka long nyngkong nyngshap ka atiar jong u Blei.

Ka Mother Teresa ka long ka briew kaba shlei pura da ka jingngeit. Khlem tip shano ? Yn sdang nangno ? kan long kumno ? ka la shu buddien beit ia ka jingpasiaw jong u Blei kumba la leh u Abraham hyndai hynthai khlem kylli khlem pyrthew, khlem tip ia ka dang ka duh, ka lashai lashisngi (peit Jenesis 12 : 1-4).

"Nga ngeit ia man ki kyntien jong u Trai", ka ju ong, "Nga ngam leh eiei, dei ma U uba leh lut."

Haba kren shaphang ka jingngeit la jong, ka ju ong :

"Nga kloi ban aiti ia la ka jingim, hynrei ym dei ia ka jingngeit jong nga."

Ka Mother ka long ruh ka briew kaba shaniah tylli ialade ha ki kti jong u Blei. Ka ju sngewhun ban pyrto ieid ia kito ki kyntien u Jisu :

“Wat khuslai wat diaw da kaba ong : ‘na ei ngan ioh bam ioh dih ne ioh jaiñ ioh nep ? u Kpa bneng jong phi u tip lypa ba phi donkam ia kine kiei kiei baroh. To im sngi tang na ka bynta ka Hima bad ka mon jong u Blei, bad u Blei un sa pynbiang ia phi ia kine kiei kiei baroh.”’ (Mattheus 6/31-33)

“Peit”, ka la ong shisien ka sngi, “Nga long kum une u let ha ka kti jong u Blei, u let u barit, ba Un thoh kat kaba u mon.”

Haba don ba kylli la ka biang pisa ban pyniaid ia ki jingtrei jong ka, ka la ong :

“Ka pisa ? ngam ju pyrkhat shaphang jong ka. Ka ju wan borabor. Ngi trei na ka bynta u Trai. Ma U keiñ u dei ban sumar ia ngi. Lada u kwah ba ngin leh eiei u dei ban sci ruh ia ki lad. Lada um pyndap pynbiang pat ia ngi, nga sngewthuh ba um kwah ia ngi ban leh ia kata ka kam. Nga shu klet noh ia ka.”

Sa kawei pat ka jinglong bashynna duh jong ka, dei ka jingieid. Ka jingieid ia u Blei ha ki baduk bad ia ki baduk ha u Blei. Kane ka pynlong ia ka ban ong :

“Ym donkam ba ngin leh ia kiei kiei kiba khraw ban pyni ia ka jingieid jong ngi ia u Blei bad ia ki paramarjan jong ngi. Dei ka jingieid kaba ngi buh ha ki jingkam jingleh jong ngi kaba pynlong ia ki – ki jingtyrwa kiba iphuh iphieng hakhmat u Blei.”

Ka ju ong ruh bunsien :

“Ka jingtrei jong ngi ka long tang ka dak jong ka jingieid jong ngi ia u Blei. Ngi dei ban theh lut ia ka jingieid jong ngi hangno hangno. Ki briew ki long ki lad ba ngi lah ban pynpaw ia ka jingieid jong ngi ia u Blei.”

Ka Mother ka long ka briew ka batrei shitom. Ka thiah tang khyndiat, ym palat ia ka ar ne lai kynta shimiet. Ka shong thoh jingthoh haduh ynda sdang kynjat shai.

"U Blei u la ai ha nga ka jingaisngewbha kaba khraw bha: ka jingkoit jingkhiah" ka la ong. Ki kti jong ka ki eh da ka jingtrei shitom, hynrei ka long ruh ka briew kaba khlaiñ, kaba trei jubor bad ka bym ju pynsepci ia la ka jong ka por.

Nalor kine, ka long ka briew kaba sngewrit, kaba ioh por na ka bynta ki President, ki Myntri rangbah ki ri bapher, ki Bishop bad ki heh ki haiñ na kylleng. Kumjuh ruh ka don por na ka bynta kito kiba don ha tmier ka jingiap, ka don por na ka bynta ki khunlung ki khynnah kiba donkam ia ka. Ka leit jngoh lut ia ki konben, bad ka da tip kyrteng ia kawei pa kawei ka sistar ha ka seng.

Lada ngi sdang ban iatai sa ia kiwei pat ki hok jong ka, ngi lah ban thoh da bun lynnong, hynrei ka shong ha phi ki nongpule ban ia sot ia kaei kaba phi sngewshoh khnang ban kyntiew ia ka longbriew kaba shimet.

Bun ki kot bad ki kot khubor ki la nam ia ka 'Ka riewkhuid ki nala' ne 'Ka riewkhuid ka juk mynta' bad kumta ter ter... Haba bishar bniah ia ka jing-im barieh jong ka, ngi shem ba ka long da shisha ka briew kaba la iakynduh khuk bad u Blei bad kaba dang iai kynduh ruh ia U ha man la ki khiep jingim, ym tang ha ka trei ka ktah jong ka, hynrei wat ha ka por kaba ka dem ban duwai.

Na ki rymmiang shyntur jong ka hi ngi iohsngew: "Ngi dei ban shem ia u Blei, bad ngin ym lah ban



shem ia u ha ka jinghumhum-hamham. U Blei u dei u lok jong ka jingjarjar. Peit kumno ka mariang, ki dieng ki siej, ki syntiew ki skud, ki phlang ki kynbat ki heh ki plung ha ka jingjarjar; Peit ia ki khlur, ka sngi, u bnai kumno ki khih ha ka jingjarjar. Hato ka kam jong ngi kam long ban ai ia u Blei ha ki baduk kiba im ha ki slum ? Ngi ai, ym dei u Blei uba la iap, hynrei u Blei uba im bad uba ieid. Ngi donkam ia ka jingjarjar khnang ba ngin lah ban ktah ia ki mynsiem. Kaba kongsan duh kam dei kaei kaba ngi ong, hynrei kaei kaba u Blei u pasiauw ha ngi bad lyngba jong ngi. Ha kane ka dur, baroh ki kyntien jong ngi kin ym phoida eiei. Ki kyntien ki bym ai ia ka jingshai u Krist, ki nang pynkhray ia ka jingdum."

La ki kam babun ki sdien rymjaiñ ia ka, hynrei, kam ju pynduh ia la ka por duwai bad ka por Mas. Mynstep lang bad kiwei ki sistar, ka shim bynta ha ki jingiaduwai lang, ka Mas bad ki jingpuson. Mynsngi, janniet bad mynmiet ruh kam ju pynduh ban leit shong ha kjat u Kynrad bad sngap ia U, namarba dei ma U uba shanbor ia ka.

Ka ju kyntu ruh ia kiwei :

"Phi dei ban ioh por la kumno kumno shiteng kynta mynstep bad shi kynta janmiet ha kaba duwai. Phi lah ban duwai haba phi trei. Ka jingtrei kam pynsangch noh ia ka jingduwai bad ka jingduwai kam pynsangch noh ia ka jingtrei. Donkam tang ba ngin kyntiew ia la ki jingmut jingpyrkhat sha U. "Nga ieid ia Me ko Blei, nga shaniah ha Me, nga ngeit ha Me, Nga donkam ia Me", kine ki long ki jingduwai kiba biang eh.

Ka Mother Teresa ka sngew hi halade ba ka jingduwai ka long ka thymmei jong ka bor treikam jong ka baroh. Namar kane ka jingsngew halade, ka la kyntu ruh ia baroh kiba ka iakynduh ba kin sot bor na kane ka Tlong jong ka Jingkhelaiñ-bor baroh: kaba long ka Yukharist Bakhuid.

“Kaei kaba kongsan duh” ka la ong, “ka long ka jingieid kaba jvlliew, ka jingieid kaba shimet ia u Jisu ha ka Sakramen. Kumta da kaba shem ia U ha ka Yukharist bakhuid, kin lah ruh ban shem ia u ha ki marjan-marpa, bad ki lah ruh ban shakri ia ki baduk ki batoi baroh.”

“Ka Mas ka long ka jingbam mynsiem kaba tei ia nga. Khlem ka Mas bakhuid ngan ym lah ban im wat shisngi ne shikynta ruh. U Jisu u wan sha ngi ha ka por mas ha ka dur u kpu bad ka waiñ, katba ha ki slum ngi iohi bad ngi ktah ia u ha ki met ki phad ba la tor bad ha ka dur ki khynnah kiba la shu shah ieh beiñ. U dei u juh u Krist uba la ong : Nga thngan, nga lyngkhuit, nga pang, ngam don iing....”

Da kane ka jingsngewdonkam halade ia ka Yukharist, ka la ban ruh ia ki sistar bad ki nongiatreilang jong ka ban niewkor bad niewburom ia ka Mas bad ka Yukharist bakhuid.

## KI KHEP JINGEH

Wat la ka pyrthei ka iohi kumba ka Mother Teresa ka shu phuhsamrkhie shilynter, hynrei da shisha kam long junom kumta. Teng teng ka jingsngewdukha mynsiem ka wan, ka jingsngewlehnohei

ka pynthame, ki briew ruh teng teng ki shu pynjulor ei ia kaba ka la pyrshang ban tei da ka jingieid bad da ka umsyep.

Da kaba sngewshipa tengteng ka ju ud wei-briew :

“Don ki por ba nga sngew thylli sat ialade, nga sngew kum ka shynrong kaba thylli, ka mar kaba khlem nongrim, khlem don eiei ban kyrshan ia nga; Nga sngew marwei bad nga sngewblaw.”

Ka dei shisha ba u Blei u tynjuh ia kito kiba u ideid da ki laiphew rukom.

Haba pyrkhath ia ka jingtrei jong ka, ka ju iam rem “Ki jingleh jong nga kim palat ia ka shijaw ha ka duriaw bah”, ka la ong. Hynrei kam klet ba ka long tang “ka atiar kaba pyndep ia kaba ka dei ban leh bad ka jah noh.” U Blei u pyndep ia kaba u mon, ha ka ia bad ka por kaba u ibit-ibiang.

Nalor kine ka ju iakynduh ruh ia ki jingeh na ki nongiatrei lang, na ki briew kiba ka trei, na ki bahalor – hynrei kam ju tieng – ka jam beit shaphrang namarba ka tip ba ka trei ia ka kam ka jong u Blei. Ma U hi un ai bor ai sor bad ialam lynti ia ka.

Kaba pynkthang dohnud duh ia ka Mother, ka long haba ki sistar jong ka ki iehnoh ia la ka jong ka jinglong Riewniam hadien ba ki la khlei ia la ka juban lak ban im duk, im sotti, bad im kohnguh shi jingim bad ban shakri ia ki baduk tam na ki baduk tam baroh. Ka ju ong : “Duwai na ka bynta kito baroh kiba don ha ka jingiasyllok ba u Blei Un sumar sukher ia ki, bad ba Un ri un kdup ia ki ha ka jingieid jong U.”

Ka briew kaba iöhi shai ia ka thong, la beh ka 'eriong ka 'erngit, la pom u pyrthat jhieh ne rkhiang, long kat kaba long, jia kat kaba jia – ka hun bad ka kmen shilynter. Ka trei na ka bynta u Blei, U Blei u long ka bainong jong ka.

**Ka Mother Teresa  
Ka long ka dak  
jong ka dur u Krist  
ha ka pyrthei kaba ngi im.**

**— JEAN VANIER.**

## **8.**

---

### **KA MOTHER TERESA KA ONG :**

#### **I. U JISU HA PYRTHEI**

##### **U Jisu u wan**

Mvnta ka sngi, sa shisien, u Jisu u wan sha ki la jong bad ki la jong kim ithuh ia U. U wan ha ka met bamong jong ki baduk; hynrei U wan ruh sha ki riewspah kiba bun ka spah sadhai. U wan ha ka jing-sngew marwei ki dohnud jong ki, haba ym don ba ieid ia ki. U Jisu u wan sha phi bad sha nga, bad bunsien, kham bunsien ngi shu shah ba un ia'id lait khlem ithuh ia U.

#### **II. KA JINGIEID**

##### **Ka Jingieid ia u Blei**

Men ieid ia u Trai u Blei jong Me da ka dohnud jong me baroh, da ka mynsiem jong me baroh bad da ka jingmut jong me baroh. Kane ka long ka

hukum bakhraw jong u Blei. U Blei um ju hukum  
ia ngi ia kaei kaei kaba ngim lah ban leh. Ka jing-  
ieid ka long kum u soh u baplung basan ha man la  
ki aom, bad uba ki kti baroh ki lah ban kheit. Kat  
uba kwah u lah ban lum ia u khlem don pud. Man  
u briew u lah ban poi sha kane ka jingieid lyngba  
ka jingpuson, ka mynsiem kaba duwai bad kaba  
len ialade, da ka jingim kaba rieh kaba dap maiñ  
da ki spah maia.

### **Ka jingieid ka dei ban pynmong**

Ka jingieid kaba nylla bad ka jingsbun kaba  
shisha ka paw shynna tang ynda phi lah ban ieid  
haduh ba ynda pynmong, lada kam pynmong kam  
dei ka jingieid kaba shisha ... U Jisu u la dei ban  
iap khnang ban pynshisha ia ka jingieid jong U.

### **Ka jingieid kaba kongsan**

Ym donkam ba ngin leh ia kiei kiei kiba khraw  
ban pyni ia ka jingieid jong ngi ia u Blei bad ia ki  
paramarjan jong ngi. Dei ka jingieid kaba ngi buh  
ha ki jingkam jingleh jong ngi kaba pynlong ia ki  
jingtyrwa jong ngi kiba iphuh-iphienh hakhmat u  
Blei.

### **Ka dak ka jingieid**

Ka jingtrei jong ngi kam long palat ban ia ka dak  
ka jingieid jong ngi ia u Blei. Ngii dei ban theh ia  
ka jingieid jong ngi hano hano, bad ki briew ki long  
ki lad ban pynpaw ia ka jingieid jong ngi ia u Blei.

## **Ka jingieid ha ka pyrthei**

Ki baduk ki dei ban tip ba ngi ieid ia ki bad ba ngi donkam ia ki. Ma ki hi kim don eiei ban ai lait noh tang ka jingieid. Ngi dei ban trei dohim-dohiap tang kumno ban pynphriang ia kane ka khubor – ka jingieid bad ka jingsngewlem. Ngi dang pyrshang ban rah ia ka jingsuk sha ka pyrthei lyngba ki jing-trei jong ngi, hynrei ka jingtrei ka long ka jingai-sngewbha jong u Blei.

Ki briew mynta ki thngan ia ka jingieid bad ka jingiasngewthuh jingmut kiba long kiba donkam bad kiba long ruh ki jubab ia baroh ki jingsngew marwei bad ki jingduk-khai. Dei na kane ka daw ba ngi lah ban leit sha kiwei pat ki ri kum ka England, ka America bad ka Australia – haei ba ym don jingthngan ia ka bam ka dih, hynrei namarba don ki briew kiba shahshitom na ka jingsngew marwei, ka jingsngew duh jingkyrmen, ka jingia isih, ka jingbym ia paiñ iing, ka jingbym donbor bad ka jingsngew lehnohei ka jingim. Don kiba la klet kumno ban phuhsamrkhie, kiba la klet ia ka jingthiang ka kti ieid jong ka jinglong briew, kiba la jan klet ka mut aïu ka jingieid kaba shisha. Ki donkam iano iano ban sngewthuh bad ban burom ia ki.

Ia ki baduk ym ju don ba burom. Bun kiba tharai ba ym lah ban ñiew ia ki baduk kum ki briew kiba lah ban ieid – ki briew kiba kum maphi bad manga. Phi tip! ki samla ki la sdang ban sngewthuh; ki kwah ban shakri da ki kti jong ki bad ban ieid da ki dohnud jong ki. Ym dei tang ban pynpaw ia ka

rongphong hynrei ki kwah ban ieid da ka mynsiem kaba shisha.

Ngi lah ban ieid na ki daw kiba pynmyntoi shi-met. Nga ieid ia phi, hynrei ha ka juh ka por nga kwah ban kjit na phi katba nga lah ei, wat ki mar kiba ngam shonghok ban shim. Hangta kam don shuh ka jingieid kaba shisha.

Ka jingieid bashisha ka pynmong. Ka dei borabor ban pynmong. Ka dei ban long kaba pynmong ban ieid iano iano, – phi dei ban kloi ban pli ia la ka jingim.

Haba ki briew ki ia poikha, ki dei ban aiti noh ia kiei kiei baroh ban ia ieid kyliang. Ka kmie kaba kha ia i khun ka dei ban shah bun ki jingshitom. Ka long kumjuh na ka bynta jong ngi ki riewniam. Ban long pura ki jong u Blei ngi dei ban aiti lut ialade bad ia kiei kiei baroh. Dei tang hangta ba ngin lah ban ieid da shisha. Sumar ! ka ktien ieid ka lah ban ialam bakla ruh ia ngi lada ngim husiar bha.

### III. KA JINGPYRKHAT LEM IA KIWEI

Ka jingpyrkhat lem ia kiwei ka long u mawjam sha ka jingkhuid kaba longblei. Da kaba long kiba pyrkhat lem ia kiwei, phi ia kham syriem dur ia u Krist. Namar ka dohnud jong U ka long kaba jemnud bad U long borabor uba pyrkhat lem ia ka jingbha jong kiwei. Ka jinglong riewniam jong ngi, khnang ba kan long kaba seisoh ka dei ban pynlong ia ngi ki briew kiba pyrkhat lem ia kiwei. U Jisu u la leit iaid sawdong ban leh ia ki kam kiba bha. Ka Maria ka



khlem leh eiei ha Kana, hynrei ka la shu pyrkhat  
lem ia ka jingdonkam jong kiwei bad ka pyntip ia  
ki ha u Jisu.

#### IV. KA JINGNGEIT

##### **Ka jingngeit, ka jingngeit bad ka Balang !**

Haei ba don ki jingmaia, hangta ka don ka jing-  
ngeit. Ia ka jingngeit phin ym lah ban pynkylla la  
phi leh kumno kumno ruh. Ia ka jingngeit phi lah  
ban don ne phi lah ban ym don – tang katta. Na ka  
bynta jong ngi ka long kaba suk namarba ki kjat  
jong ngi ki don ha khyndew. Ngi im bad bun ki  
jingshisha kiba paw tyngkrein.

##### **Ka jingstad bad ka jingngeit**

Ka jingnang jingtip jong ngi kan ym lah ban kah  
dum ia ka jingngeit jong ngi. Hynrei ka nang pyni  
ia ka jingiar ka matti jong u Blei. Bunsien ngin ym  
lah ban sngewthuh. Ngam tip lada phi la pule ha ka  
jingim jong u Akostin bakhuid; ka long ka nuksa  
kaba biang eh. U Akostin bakhuid u la shem shitom  
shibun ban sngewthuh shaphang u Blei, ban sngew-  
thuh shaphang ka Trinity Bakhuid, ban sngewthuh  
shaphang ka jingiar ka matti u Blei. Da ka jingpyr-  
khat briew, ym shym lah ban sngewthuh ia kata. U  
la leit wad shane shatai bad ha kawei ka sngi u la  
lap ia uwei u khynnah rit, uba dang pyrshang ban  
pyndap um ha kawei ka thliew rit. U Akostin u la  
kylli ia uta u khynnah ba u mut ban leh aïu, bad u  
la ioh ia kane ka jubab : “Nga dang pyrshang ban

jiar ïa kane ka um jong kane duriaw-bah ha ine i thliew rit." U Akostin u la lyngngoh ngaiñ bad u la kem ktien ba kata te ka bym lah long. Te, Uta u khynnah uba long da shisha u angel u la ong : 'Ka kham suk ban jiar lut ïa ka um jong ka duriaw ha ine i thliew ban ïa kaba sngewthuh ïa ka jingmaïa jong u Blei', bad ka long kaba shisha.

## V. KA BOR PYRKHAT

U Blei u la thaw ïa kiei kiei baroh. Ki thap-balieh, ki mrad ki mreng bad ïa ka mariang baroh kawei u la thaw na ka bynta jong ngi. Ha ki u khlem ai ka bor pyrkhat ba kin lah ban jied. Ki don tang ka jingsngew (instinct). Ki mrad ki lah ban ieid bad ban ieid ha ka rukom kaba phylla – hynrei kata baroh ka long tang ka jingsngew. U Briew u lah ban jied, bad u Blei un ym shim noh – ka bor pyrkhat, ka bor ban mon bad ban jied na u. Nga kwah ban leit sha bneng bad ngan sa leit khlem pep da ka jingaiei jong u Blei. Lada nga jied ban leh pop bad ban leit sha dujok, kata ka long ka jingjied jong nga hi. U Blei un ym lah ban leh bor pyrshah ïa ka mon jong nga. Dei na kata ka daw ba ngi aiti mon ïa la ka bor pyrkhat haba ngi kylla long ki riewniam.

## VI. KA JINGDUWAI

### **Ka jingduwai jong nga**

Nga duwai ba man uwei pa uwei na phi, phin long kiba khuid ! ba phin lah ban pynphriang ïa ka jingieid jong U sha katba phi leit.

To ai ba ka jingshai jong ka jingshisha jòng U kan synran ia ka jingim jong phi kaba man ka sngi. Da kumta u Blei Un lah ban nang iai ieid ia ka pyrthei lyngba jong phi bad da phi.

### **Ieid ban duwai**

To ieid ia ka jingduwai, ka jingduwai kan pynheh ia ka dohnud jong phi haduh ba phin lah ban kdup lut halade ia ka jingaiei jong u Blei. Pan bad wad, bad ka dohnud jong phi kan plung kan san haduh ba phin lah ban pdiang ia U, kum u la jong.

### **Ka nongrim ka jingim**

Ngi pynshong nongrim ia ka jingtrei jong ngi ha ka jingduwai.

### **Ka jingjarjar bad ka jingduwai**

Khlem don ka jingjarjar ngin ym lah ban duwai!

## **VII. KA JINGJARJAR**

U Blei U dei u paralok jong ka jingjarjar. Ka jingkren jong U ka long "To jai jai bad to tip ba Nga dei u Blei." U kwah ia ngi ban sngapjar khnang ba ngin lah ban shem ia U. Ha ka jingjarjar jong ka mynsiem, u Blei U kren.

U Jisu U la pynleit sawphew sngi ha ka jingjarjar shuwa ba Un sdang ia ka kam paidbah jong U. Bunsien U ju leit sha ka jaka bamarwei, u peit miet

halor ki lum da kaba sngapjar bad da kaba duwai.  
Ma U Uba la kren da ka bor kaba phylla, U la pyn-  
leit por shuwa ha ka jingjarjar.

## VIII. KA MAS BAKHUID

### **Ka Mas ka ai bor**

Ngam lah ban im khlem ka Mas bakhuid, khlem u Jisu. Dei namarba nga iöhi ia u Jisu ha ka dur u kpu ba ngan sa lah iöhi ruh ia u ha ki met batlor jong ki baduk. Dei namar kane ka daw ba nga kwah ban long kawei bad u Krist. Lada nga don ka jing-ngeit kaba jylliew ha ka Yukharist Bakhuid, nangta ngan sa lah ban ktah ia U ha ki met bator, namar ma U hi u la ong, 'nga long u Kpu jingim'.

### **Ka dak jong ka Jingiatylli**

Ka Yukharist ka long ka dak bad u Mawdong jong ka jingiatylli. Ngi ia long kawei sawdong ka duwan ha kaba u Trai u don da shisha ha ka Sakramen Bakhuid. Ngi dei ban duwai na ka bynta ka jingiatylli jong u paid Kristan baroh, ba kan don ka jingiatylli bashisha hapdeng jong ngi kum kawei ka Met u Krist.

## IX. KI MISSIONARY OF CHARITY

### **Ki alti ialade shitylli**

Ki Missionary of Charity ki dei ban ai, bad kaba kongsan eh ka long ba ki dei ban ai ialade shitylli.

## **U Atiar bad u nongtrei**

Ngi long tang ki atiar kiba dei ban pyndep ia ki bynta barit ba ngi dei ban leh – nangta pat ngi jah noh.

## **Ka jingleh barit ka blang eh**

Haba don ba ong ba ki sistar kim shym la leh ia ki kam kiba heh kiba khraw, ba ki shu pyndep tang ia ki kam barit-baria bad ba ki briew kim bna ia ka jingdon jong ki, nga jubab ba lada ki la iarap wat tang ia uwei u briew ruh ka la biang. U Jisu un jin da la iap mon sngewbha wat tang na ka bynta uwei u briew – uwei u nongpop.

## **U Krist u sliang**

Ha man la ki iing jong ngi, haba phi rung ha ka iingmane, phin iohi ia ki kyntien NGA SLIANG ! Ka jingkhoh jong u Jisu. Ngi im ban pyntngen ia u Jisu, ban pynjah ia ka jingthynrang jong U. Kane ka long ka kam bad ka jingthmu jong ngi.

## **Ka Jingshisha kan pynneh ia ki**

Lada ki sistar kim long kiba hun bad kiba palei ha ka jingkhoh jong ki, ieh u Trai un pynduh noh ia kane ka jingiasyllok. U Trai u lah ban trei khlem ma ki, ka Balang ka lah ban iaaid shaphrang khlem ma ki. Ki Missionary of Charity ki dei ban long kiba hun bad kiba palei ha ka jingkhoh jong ki, kumba long u Krist Uba la khot ia ki da ka mon sngewbha.

## **Ka jingkmén ban trei : ka kam phylla**

Ka kam phylla kam long ba ngi trei iā kane ka kam, hynrei ba ngi kmen ban trei iā kane ka kam.

## **Ka jingthmu**

Kumno ngi shah iā u Blei ba un pyndonkam iā ngi ? Kata ka long kaba kongsan. Kaei kaba u leh lyngba jong ngi – kata ka long kaba kongsan. Namar ba ngi long ki riewniam, ka jingkhót jong ngi kam dei ban trei tang na ka bynta ki bapang ñiang-lyngkut, ne kiba don ha tmier ka jingīap. Ka jingkhót jong ngi ka long ban long shitylli ki jong u Jisu. Namarba nga dei ka jong U, ka jingtrei ka long kum ka lad ban pynpaw iā ka jingieid jong nga iā u ha ki rukom kiba paw. Te, ka jingtrei kam long ka thong, hynrei ka long ka lad, namarba ka jingkhót jong nga ka dei ba ngan long ka jong u Blei shitylli, ban ieid iā U da ka jingieid bad ka jingsotti kaba palei. Manga nga la smai iā ka soksular.

Nga iōhi iā u Krist ha uwei pa uwei u briew uba nga ktah, namarba u la ong, 'Nga thngan, nga sliang, nga lyngkhuit, ngam don iing' – Ka long kaba suk haduh katta katta. Man ka teng ba nga ai shi lyngkhót u ruti – nga ai iā U. Na kata ka daw, ngi dei ban shem iā u – ma U uba thngan, ma U uba sliang. Dei na kane ka daw ba ngi sngew jan bha bad ki baduk.

Phi lah ban wallam iā ka jingpynim tang da kaba leh hok bad da kaba trei shisha lang bad u Blei. Ym dei katno ngi leh, hynrei katno ngi leh da ka jingieid, ka jingleh hok, ka jingngeit. Kaei kaba phi

leh, nga ngan ym lah ban leh, bad ia kaei kaba nga nga leh, phi phin ym lah ban leh. Hynrei mangi baroh ngi ia leh ia kaei kaba u Blei u la pynkhamti ha ngi ban leh. Teng teng ngi klet bad ngi pynlut por ha kaba ap ia kiwei ne ha kaba pyrkhat ban leh ia kiei kiei ki bym dei ka bhah jong ngi.

Ngi pynsepei ia ka por da kaba pyrkhat shaphang ka lashai, bad ngi shu shah ia ka mynta ba kan shu iaïd lait haba ka mynnin ka la leit.

## X. KA JINGKYLLA KA BAMUT

Nga kyrmen ba ngi dang pynkylla ia ki dohnud. Wat u Blei badonbor baroh ruh un ym lah ban pynkylla ia u briew, lynda uta u briew u mon hi. Kaei kaba ngi ia pyrshang da ka jingtrei jong ngi, da kaba shakri ia ki briew ka long ban tur kham jan sha u Blei. Lada, da kaba wan markhmat bad u Blei ngi pdiang ia u ha ka jingim jong ngi, hangta keiñ ngi kylla. Ngi long ki hindu kiba kham bha, ki musulman kiba kham bha, u Katholik uba khambha, – uba kham bha kat ba ngi long, bad da kaba khambha ngi kham jan shuh shuh sha U. Lada ngi pdiang pura ia U ha ka jingim jong ngi, kata keiñ ka long ka jingkylla kaba mut. Ngan pyndonkam da kano ka phang? ngan bud da kano ka lynti? na ka bynta jong nga, khlem pep kan long ka jinghikai jong ka Balang Katholik; na ka bynta jong phi ka lah ban long ka jinghikai Hindu, na ka bynta kiwei pat ka jinghikai Buddhist – Katkum ka jingiatiplem jong u briew shimet. Phi dei ban pdiang ia U Blei uba don ha ka dohnud jong phi. Hynrei, ngam lah ban

khanglad ialade na kaba pyrshang ban ai ha phi ia kaei kaba nga don.

Nga angnud da shisha ba ki briew kin tip ia u Blei, kin ieid ia U, kin shakri ia U, namar kata ka long ka jingkmien kaba shisha. Bad nga da kwah ba ki briew baroh ha ka pyrthei kin don ia kata. Lada ki la iohi ia ka jingshai, ki lah ban bud ruh ia ka, ka dei ka jingjied jong ki. Ngam lah ban ai ha ki ia ka jingshai – nga lah ban tyrwa tang ki lad.

## XI. KA POP

U Blei u shongsah bad ngi. Kata keiñ kaba ai bor ia nga. Kampher haei phi don katba phi dang khuid ha ka dohnud, U don bad phi bad hapoh jong phi 24 kynta. Dei na kata ka daw ba U ong : “Ieid ia kiwei kumba nga ieid ia phi.” Ban khuid ha ka dohnud ka mut ban plie wang ialade, ka mut, ka jing-laitluid bapura, ka mut ban pynshongnongrim ialade ha kiei kiei ki ban ym lah ban khanglad ia ngi ban ieid ia u Blei. Haba ka pop ka rung ha ka jing-im jong ngi, kata ka long ka diengpyngkiang kaba pyniakhlad ia u Blei na ngi. Da kumta u Blei um lah ban leh eiei lyngba jong ngi ne ban aibor ia ngi haba don ka pop hapdeng. Ka pop ka long ka jingteh-mraw.

Haba nga jied ia ka jingsniew, nga leh pop. Dei hangne ba rung ka mon jong nga. Haba nga wad kabu na ka bynta ialade shimet – khlem pyrkhat shuh ia kiwei, nga mon ia ka pop.



## **XII. KI BADUK**

### **U Paramarjan jong ngi**

Ki briew kiba ngi dei ban ieid, ban wad, ki lah ban im hajan ne ha jngai. Ki lah ban duk ha ka met ne ha ka mynsiem. Ki lah ban thngan ia ka jingsuk ne ka jingieid. Ki lah ban duna ha ka jaiñ ka nep ne ha ka jingnang ka jingtip jong ki shaphang ka jingieid jong u Blei; ki lah ban dei kito kiba wad ia ka jaka rieh tngen ba la shna da ki mawit bad da ka dew bilat ne ia ka iing ba la tei da ka jingieid ha ki dohnud briew.

### **U Krist ha ki baduk**

To ngin ym klet ia kane, ba ha ka jingshakri ia ki baduk, la plie ha ngi ia ki lad ban leh ia kaei kaei kaba ithiang na ka bynta u Blei. Namar haba ngi aiti lut ialade ha kaba shakri laitluid ia ki baduk, ngi tyrwa ia ki ha u Krist uba phong ha lade ia kane ka dur. Kumba u la ong : 'Phi leh ha nga'.

### **Ka jingduk – ka Ktien phira jong ngi**

Ka jingduk jong ngi ka long ka ktien phira jong ngi. Ngim kwah ban leh kum kiwei pat ki seng ricwniam kiba la sdang da kaba shakri ia ki baduk bad ki ba kut pat ha kaba shakri ia kiba don ba em. Khnang ba ngin lah ban sngewthuh bad ban iarap ia kito ki bym don eiei, ngi dei ban im kum ma ki ... ka jingiapher ka long tang ha kane, ba ki briew ki duk namar ba la kha ia ki kumta, katba ma ngi pat ngi duk da ka jingjied mon sngewbha jong ngi hi.

Ka long ka bashisha ba lada ngim lah ban iöhi ia u Krist ha ki bashah ban beiñ, ka jingim jong ngi kan ym don jingmyntoi eiei.

### **Ka Jingiarap ki baduk ia ngi**

Tang ha bneng ngin sa shemphang pura katno ngi dei ban sngewnguh ia ki baduk kiba la ialam ia ngi ban nang kham ieid shuh shuh ia u Blei lyngba jong ki.

### **Ki baduk ki ba ha iing ha sem jong nga**

Ka kynhun imlang sahlang jong nga dei ki baduk. Ka jingshngaiñ jong ki dei ka jingshngaiñ jong nga. Ka dohnud jong ki dei ka jong nga. Ka iing jong nga ka dei ka jong ki baduk. Ym dei tang na ka bynta ki baduk, hynrei na ka bynta ki baduk tam na ki baduk baroh. Kito kiba jakhlia bad kiba dap ryñieng da ki khñiang jingpang, kiba ym don briew ba nud ban tur shajan. Kito ki bym leit duwai shuh namarba ki lyngkhuit; kito ki bym bam namar ba kim donbor shuh, kito kiba kyllon ha ki surok ki lynti, kiba tip ba kin sa iap noh; kito ki bym iam namar ba kim don ummat shuh....

### **Ka kyrdan ki baduk**

Ki baduk ki long ki briew kiba bha – ki don ia la ka jong ka kyrdan kaba ngi dei ban ñiewkor. Bunsien ym ju da kham don ba ithuh ia ki baduk – dei namar kane ka daw ba ki briew kim lah ban iöhi ia ka kyrdan jong ki. Hynrei ki don ia ka jingshlur kaba khraw bha ban im ka jingim kaba ki im. La

shu long kumba pynbor ïa ki ban im ha kane ka dur.  
Mangi, ngi pdiang hun ïa ka jingduk jong ngi, katba  
ha ki baduk pat la bynshet jubor ïa ka ha ki.

### **Ki baduk ki long kiba khraw**

Ki baduk ki long ki briew kiba khraw. Ki ai ha  
ngi kham bun shuh shuh ban ïa kaba ngi ai ha ki.  
Ngi la nang bun kiei kiei na ki. Kim donkam ïa ka  
jingsngewsynei jong ngi, hynrei ki donkam ïa ka  
jingieid bad ka jingsngewlem jong ngi.

### **Shakri da tip ïa ki baduk**

Phim lah ban shakri ïa ki baduk lymda phi tip  
ïa ki, bad phim lah ban shakri ïa ki lymda phi ieid  
ïa ki.

## **XIII. KA PISA**

### **Nga ai palat ïa ka pisa**

Nga kwah ban ai ha ki baduk ïa kaei kaba ki  
briew kiba riewspah ki ioh da ka pisa. Nga pyrshang  
ban ai ïa ki da ka jingieid. Ka long kaba shisha :  
Ngan ym ktah ïa u nongpang ñianglyngkut na ka  
bynta shimilian tyngka; hynrei, nga pynkoit ïa ki  
jingmong jong ki namar ka jingieid kaba nga don  
ïa u Krist.

### **Ka pisa ka tyngka kam biang**

Ka pisa ka tyngka kam biang; ka lah ban thied  
tang ïa ki mar kum ka jingbam, ki jaiñ bad ka jaka

ban rich tngen. Dang donkam eiei shuh nador kane. Don ki jingsniew kiba ngim lah ban pynduh pyndam da ka pisa – hynrei tang da ka jingieid.

#### **XIV. KA JINGSGEW KYNJAH MARWEI**

##### **Wat shah iano iano**

Wat shah iano iano khamtam ki la jong, ba kin sngewmarwei, kin sngew shah kyntait beiñ ne kin sngew ba ym don ba ieid ia ki.

##### **Barabor ka longbriew**

Ngam ju shim ia u briew kum ka kynhun, hynrei man la u briew u don ia la ka jong ka jinglong bashimet. Nga ju shim ia u kum “Uwei,” na ka kynhun. Lada nga shu shim kyllum ia u ha ka jinglong paidbah – ngan ym da la lah ban sdang ia kane ka jingtrei jingtah jong nga. Kaei kaba kongsan dei u briew ha ka jinglong bashimet jong u. Nga ngeit skhem ha kaba iakynduh ia u briew.

##### **U Krist ha kiba shah iehbeiñ**

U Krist u don lang mynta ka sngi ha kito ki briew kiba la shu shah kyntait beiñ, ki bym don jingtrei, ki bym ioh ia ka jingsumar-sukher kaba donkam, kiba thngan, ki bym don jaiñphong, ki bym don iing. Ka State bad ka imlang sahang ka ju pyrkhat ba ki long tang kum u thliem. Ym ju don ba pyllait por na ka bynta jong ki. Maphi bad manga ngi shonghok kum ki kristan, ia ka jingieid jong u

Krist. Lada ka jingieid jong ngi ka long kaba shi-sha – ngi don ia ka deiti ban sumar ia kine ki brieve bad ban iarap ruh ia ki.

## **XV. KA IING KA SEM**

### **Nyngkong nyngshap na la iing**

Nga la ong ia ki ban pynmlien ban ieid nyngkong nyngshap ia kiba ha iing ha sem la jong, nangta pat ia ki paramarjan marpa, bud sa ia ki dkhot ka dong bad khatduh khatwai ia ka pyrthei shityllup. Hynrei, nyngkong nyngshap ki dei ban don ha la ki jong ki iing ki sem ia ka jingieid bad ka jingiasngewthuh jingmut. Ka jingiaieid kyliang hapdeng ki dkhot ka iing ka sem, ka wanlam ia ka jingsuk.

### **Kam long kaba suk ban ieid ia kiba hajan**

Ka long kaba suk borabor ban ieid ia kito kiba im shajngai. Hynrei ka long kaba kham eh ban ieid ia kito kiba im marsyndah bad ngi. Ka long kaba kham suk ban tyrwa shipliang ka ja ia u brieve uba thngan ban ia kaba leh ieid leh isynei ia uwei na ki dkhot ka iing ka sem.

### **Phi tbeh jingshai na la iing nyngkong**

Da ka nuksa, ka jingieid, ka jingsngewlem da ki kti ba jemnud jong phi, da ka jingsngewthuh bad ka jingieid ha la iing shuwa bad nangta sha ki paramarjan, phin tbeh ia ka jingshai bad phin kyrsiew ia ka pyrthei ba kan sngewlem, kan sngewthuh ia ka

jingkyrmen jong kiba duk kiba long ki hynmen ki para jong ngi.

## **XVI. KA MARIA, KA KMIE**

To ngin ia kyrpad ia ka Maria Theisotti ba kan pynlong ia ki dohnud jong ngi kiba sngewrit bad kiba jemnud, kumba long u khun jong Ka. Ka long kaba suk eh ban long uba sarong, uba hangamei bad uba pyrkhat shimet; hynrei la thaw ia ngi na ka bynta kiei kiei kiba kham khraw. Katno ngi dei ban wad jingnang jingtip na ka Maria ! Ka la long ka basngewrit namarba ka la aiti lut ialade ha u Blei. Ka long kaba dap da ka jingaiei. To ong ia ka Maria ban pasiaw ha ki shkor u Jisu. "Kim don waiñ shuh" – ka waiñ jong ka jingsngewrit, ka jingjemnud, ka jingshida bad ka jingsbun. Khlem pep kan sa ong ruh ia ngi "To leh kat kaba un ong ha phi." Pdiang hun ia ki khep baroh kiba U phah ha phi. Ngin nang ban long kiba sngewrit tang haba ngi lah ban pdiang hun ia ki jingshah ñiewbeiñ baroh.

## **XVII. KI KHUNLUNG KI KHYNNAH**

### **Ka jingialeh**

Nga dang ialeh pyrshah ia ka jingpynduh khun da kaba tingkhun.

### **Ka dor ka jingim**

Ki khunlung kim dei ban iap khlem da don ba sumar ne ba ieid ia ki. Namar wat i khunlung rit ruh i don ia ka jingsngew. Lada ngi kyntait ia ki, kata

ngi khang khyrdep ia ka jingkhang bad kine ki khunlung kin sa shu iap ei. Ka bha ba kin iap kumba la mang ia ki ban ia kaba shu pyniap ia ki.

### **Ka jingpynduh khun**

Tang u Blei uba lah ban bah khlieh shaphang ka iap ka im. Uba koit uba khlaiñ u lah ban khamjan sha ka jingiap, ne ban kham iap ban ia u briew uba la don ha tmier. Ki lah ban long kiba la iap ha ka mynsiem, wat la kam paw shabar. Ngi long kiei ban ai ia ka jingrai jong ngi halor ka iap ka im ?

Dei na kata ka daw ba ka jingpynduh khun ka long ka pop kaba khraw. Ym dei tang ba phi pyniap ia ka jingim, hynrei phi buh ialade ha ka kyrdan jong u Blei. Ki briew ki rai hi dalade uno u dei ban im bad uno pat u dei ban iap – ki kwah ban pynlong ialade ki blei badonbor baroh. Ki kwah ban shim ia ka bor kaba dei tang ka jong u Blei ha ki kti jong ki. Ki kwah ban ong : “Nga lah ban leh kat kaba nga mon khlem u Blei, nga lah ban bah khlieh.” Kane ka long kaba longksuid duh ha ka jingim briew. Dei na kata ka daw ba ngi dei ban siewdor mynta ha kane ka pyrthei da kaba shah ia bun ki jingjia kiba khyllah. Ka long ka jingpynshitom, ka long ka jing-iambriew jong kito ki khunlung kiba ud sa ud hakhmat u Blei. Ka long kaei kaei kaba ia pyrshah wat ia ka jingmut jingpyrkhat ruh. Ngi pynlut da ki milion ban pynjan ia ka jingim jong ki tymmen ki kro kiba la iap shiteng, bad pylleiñ hakhmat jong ngi don ka jingim kaba dei ban long u rishot bah ka lashai hynrei ngim pyrwa – ngam sngewthuh !

## **XVIII. KA JINGĬAP**

Ka jingĭap ka long ka jingleitphai sha la iing; la katta ruh bun kiba tieng ĭa kaei ka ban jia bad ki sngewsheptieng ban ĭap. Lada ym don jingmaĭa – ngin ym tieng ban ĭap. Ka don ruh ka jingĭatiplem – “Nga la dei ban leh khambha.”

Bunsien kumba ngi im kumta ngi ĭap. Ka jingĭap kam long ka jingkut hynrei ka long ka jingbteng ĭa ka jingim, ka jingpynpura ĭa ka jingim, ka jingdem mon ĭa la ka jong ka jingim. Ka dohnud bad ka mynsiem ki im junom – kim ju ĭap. Man ka niam ka hikai ĭa ka BYMJUKUT – Kawei pat ka jingim, kane ka jingim kam dei ka jingkut.

Lada ngi sngewthuh shai ba ka jingĭap ka long tang ka jingleitphai pat sha la iing bad u Blei – hangta yn ym don jingtieng.

## **XIX. KA JINGBISHAR**

**Yn bishar da ka jingim kaba man ka sngi**

Yn sa bishar ĭa ngi, da kumno ngi la sumar ĭa ki bathngan, ki bapang, kiba shah ieh beiñ. Yn sa bishar ĭa ngi da ka jingieid kaba ngi la pyni ha ki. Ki long ka jingkyrmen jong ngi, ka boina na ka bynta ka jingpynim jong ngi hi shimet. Ngī dei ban jan bad ban sumar ĭa ki baduk – namar da kaba leh kumta ngi sumar ĭa u Jisu hi. Ngī dei ban iohi ĭa u Jisu ha ki.

**U diengkot u long ka jingieid**

Ha ka Jingthoh Bakhuid, u Jisu u la ong ba yn sa bishar ĭa ngi ha ka sngi khatduh. Yn sa bishar ĭa ngi



da u diengkot ka jingieid. Ym dei da ka jingdon  
jingem ne ki diploma kiba ngi ioh - hynrei katno  
ngi la ieid.

## **XX. KA BNENG**

Baroh ngi angnud ia ka bneng ha kaba u Blei U  
don. Hynrei hangne U tyrwa ha ngi ia ki lad ban  
don ha bneng lang bad ngi sdang naduh mynta, ban  
kmen lang bad U naduh kane ka khyllipmat. Ban  
kmen bad u Blei ka mut ban ieid kumba u ieid, ban  
iarap kumba u iarap, ban ai kumba u ai, ban shakri  
kumba u shakri, ban pynim kumba u pynim, ban  
don lang bad u 24 kynta ban ia don kti lang bad ka  
jingshahshitom jong u ha ki baduk tam na ki baduk.

## **XXI. KIWEI PAT KI MAT**

### **Ka Jingiamap kylliang**

U Kristan u dei ban nang ban map. Ngi dei ban  
sngewthuh ba khnang ba ngin lah ban ioh jingmap,  
ngi dei ban lah ban map. Nga dang pyrkhat sha-  
phang ka Ireland bashatei, ka Bangladesh, ka  
Amman bad kiwei de ki jaka. Tang ynda ki lah ban  
ia map kylliang kin sa ioh ia ka jingsuk.

### **Ka Jingsbun**

Ngam kwah ia phi ba phin leh ki kambah da ka  
jingbysbun, hynrei nga kham lah ba phin bakla  
da ka jingsbun.

## **Ka Jingphuhsamrkhie**

Haba u briew baduk u wan sha phi, pdiang ia u da ka jingphuhsamrkhie. Kane ka long ka jingai bakhraw tam ba u Blei u lah ban ai ha phi : ban don ia ka bor ban pdiang ia kiei kiei kiba U lah ban phah, bad ban kloï ban aiti noh ha U ia kiei kiei kiba U lah ban pan na phi.

## **Ki jingleh barit**

Wat tharai ba i jinglehbha barit jong phi ia la u paramarjan ki long ki bym shongdor. Ym dei eh katno ngi lah ban leh kaba pynkmen ia u Blei, hynrei katno ngi la leh da ka jingieid – kata kaba kham kongsan.

## **Ka jingsngewrit**

Wat shah ba kan don ka jingsarong ne ka jingthala ha ka jingtrei jong phi. Ka jingtrei ka dei ka jong u Blei – ki baduk ki long ki baduk jong u Blei. Buh ialade tylli tyllan ha ka jingiaid jong u Jisu ba phin lah ban pyrkhat ia ki jingpyrkhat jong U ha ki jingmut jong phi, ba phin lah ban pyndep ia ki kam jong U lyngba ki kti jong phi, ba phin long kiba khlaïñ bor da u, Uba shanbor ia phi.

## **Ka jingaisngewbha**

Nga kyrmen ba phim ai na kaba tam ba lait. Phi dei ban ai na kaei kaba ktah ia phi. Leh kunai bad len ialade na kaei kaba phi kwah, kumta ka jingtyrwa jong phi kan dondor hakhmat u Blei; da

kaba leh kumne phin long da shisha ki hynmen ki  
para jong ki baduk, ki bym don eiei.

### **Ka jingkmen**

Da ka jingkmen, ngi dei ban iakynduh ia u Krist  
uba wan ha ka dur jong ki briew kiba poh tam,  
namarba :

Ka jingkmen ka long ka jingieid,  
Ka jingkmen ka long ka jingduwai,  
Ka jingkmen ka long ka bor,

Ka jingkmen ka long ka jar ha kaba phi lah ban  
kem ia ki mynsiem. U Blei u ieid ia u nongai uba  
kmen. Uba ai bun eh dei uta uba ai da ka jingieid.  
Ngi lah ban pynpaw ia ka jingieid jong ngi ia u Blei  
bad ia ki briew ha ka rukom kaba bha duh da kaba  
pdiang ia kiei kiei baroh da ka jingkmen. Ka dohnud  
kaba kmen ka dei ka dohnud kaba rhem da ka jing-  
kmen. Wat shah ba kiei kiei kin tyллеp bad pynklet  
ia phi ia ka jingieid jong u Krist uba la mihpat.

Baroh ngi angnud ia ka bneng ha kaba u Blei u  
don. Hynrei ngi don ia ka bor ban don ha bneng  
mynta hi : Da kaba kmen lang bad U ha kane hi ka  
khyllipmat. Ban kmen lang bad u mynta ka mut :

Ban ieid kumba U ieid,  
Ban iarap kumba U iarap,  
Ban ai kumba U ai,  
Ban shakri kumba U shakri,  
Ban pynim kumba U pynim

Ban don lang bad u baroh 24 kynta,  
Ban ktah ia u ha ki dur bapher.

### **Ka jingsuk**

Ngin sa pynlong ia une u snem : U snem jong ka jingsuk ha ka rukom kaba kyrpang; khnang ba ngin lah ban leh ia kane, ngi dei ban pyrshang katba lah ban ia kren khambun ia u Blei bad ban don bad u Blei. Ngin ialap ia ka jingsuk jong u Krist ha kiei kiba ngi leh. U Jisu u la leit iaaid kylleng ban leh bha; u khlem sangeh ia ka jingtrei babha jong U, namar ki pharisi bad ki nonghikai kiba la pyrshang ban pynjulor ia ka jingtrei u Kpa jong u. U la leit kylleng ban leh bha. U Kardinal Newman u la thoh : 'Iarap ia nga ban pynphriang ia ki ator jong Me shaei ba nga leit – Ai ba ngan ialap ia Me khlem da ang ia la ka shyntur. Ym da ka ktien hynrei da ka nuksa jong nga kaba long kaba donbor ban khring : Ban pynshoh jingmut da kaei kaba nga leh. Pyndap ia ka dohnud jong nga da ka jingieid jong Me."